

東  
華  
續  
錄

東華續錄

光緒四十四

臣朱壽朋敬編

臣潘鴻鼎恭校

冬十月庚申朔時享 太廟遣世鐸恭代行禮○劉錦棠奏據委辦吐魯番善後局務甘肅候補道雷聲達稟稱已故吐魯番魯克沁回子郡王阿克拉依都原任葉爾羌阿奇木伯克同治三年庫車逆回犯葉爾羌城該回王隨同官兵打仗被執於同治十二年遇害捐軀其子瑪木特現已及歲可否請賜世緝等因當飭署吐魯番同知楊大年查取宗圖冊結旋據加結蓋印詳送前來查光緒四年臣在喀什噶爾行營探訪回疆四城歷年殉難滿漢文武官員及各阿奇木伯克銜名事實據魯克沁回子郡王前葉爾羌阿奇木伯克阿克拉依都之子瑪木特稟稱伊父承襲魯克沁回子郡王世爵充當葉爾羌阿奇木伯克同治三年庫克等處漢回變亂犯葉爾羌城伊父隨同官兵出城打仗力竭被執擁至庫車監禁三年又移喀什噶爾監禁六年始終不屈十二年安集延逆酋阿古柏於禁中取出殺害經臣咨報大學士前陝甘總督臣左宗棠具奏請卹嗣經理藩院於光緒五年五月初五日議奏本日奉 旨給卹賞銀一千一百兩等因欽此欽遵在案臣惟吐魯番魯克沁回子郡王自額敏和卓肇封三傳至阿克拉依都咸豐

年間曾充葉爾羌阿奇木伯克嗣因回逆倡亂隨同官軍打仗力竭被執監禁九年之久未嘗屈辱猝遇  
戕害大節無虧伊子瑪木特半已及歲例得承襲魯克沁回子郡王世爵應請 旨飭下理藩院核議以  
便遵行下所司議奏○辛酉何璟奏本年六月十九二十等日臺灣臺北兩府猝被颶風大雨溪水陡漲  
淹沒民田並傷斃人口多名已飭屬查明妥籌賑恤得 旨覽奏臺灣等處被災情形殊深軫念著卽飭  
屬妥爲撫恤毋任失所○銘安等奏光緒七年八月二十七日准盛京刑部咨開內閣奉 上諭御史胡  
隆洵奏請盜案仍照舊制分別首從辦理一摺著刑部議奏欽此部議以各省辦理未能一律必欲復情  
有可原舊例莫若將就地正法章程先行停止請 旨飭下各省疆臣體察地方情形將夥衆持械強劫  
案件仍照例解由該管上司覆勘分別題奏請 旨不得先行正法迅速妥議具奏等因光緒七年閏七  
月二十五日奏奉 旨依議欽此欽遵通行前來奴才等詳繹部議意在慎重刑章以期規復舊例推廣  
皇仁第立法貴乎因時安良必先除暴古省地方情形迥非內省可比謹爲 聖主詳陳之查吉省爲  
我 朝根本重地人民厚樸者固多而土著及外來匪徒密相煽結肆行劫擄愍不畏法者正復不少殺  
人放火既視爲故常拒捕逞兇遂成爲積習同治八年經盛京將軍都興阿等奏准奉天拿獲馬賊仍照  
軍務省分援案就地正法歷經遵辦在案奴才等蒞任之初盜風正熾結夥數百人藍旗列隊肆出搶劫

省城以外各村鎮均被蹂躪幾無淨土迭飭官弁督帶兵役分投剿捕擒獲後發交盜案局委員虛衷研鞫既不可鍛鍊以成獄亦不可姑息以養奸總期無枉無縱其情真罪當法無可貸者審實立置重典以昭炯戒其被脅從爲盜並未得財及情罪尙輕等犯必分別按例核辦實於除惡務盡之中默體 聖朝欽恤民命之意數年以來正法盜匪不下數千人俱經奴才等先後彙核奏報在案迄今雖無大股盜匪而山深林密伏莽尙多往往十數成羣乘間竊發或將事主燒灼以逼財或將村人擄縛以勒贖此等兇暴昭著之徒必須隨拿隨辦方足以伸 國憲而靖地方若於擒獲錄供後盡由覆勘分別題奏請 旨然後正法不惟案牘紛煩且不服給贖恐道路偶有疏虞巨愆不免漏網各處圍圍充塞顯戮久稽難保無意外之變本年正月三姓盜匪越獄六月省城羣盜圍獄雖皆立時拿獲正法竟致殺傷多人可爲前鑒奴才等現在力圖整頓吏治並新設州縣等官選廉正公清者以膺其任各屬興養立教次第舉行務期化莠爲良勝殘去殺然目前遠欲兇徒斂戢勢實有所不能奴才反覆思維所有吉省審辦盜案擬請仍照奏定新章審實後就地正法以期淨絕根株不留餘孽俟數年後再由 奴才等體察地方情形如果盜風稍息卽將就地正法章程奏請停止並將盜案分別首從援照舊例辦理得 旨如所請行○壬戌祥亨等奏前就押荒項下續練察哈爾官兵五百名飭令改駐前營適中之地常川訓練以資鎮攝用戢

盜氛惟查蒙兵習於遊牧操演戰陣未能精熟士卒技藝必須精益求精始有實效督飭統帶營總各官  
勸加教練外奴才等仍隨時前往校閱一俟練有成效擇其技藝精熟者酌量留營委充教習再由各旗  
備調額兵內另煉月營更替操練所有統帶官兵應領俸給口分以及冬春餼養馬匹津貼等項悉照前  
項防營從減核發奏准成案開支等因奉蒙 聖鑒在案查該軍開練以來已屆半載經奴才等督飭該  
統帶營總各官實力教練認真演操一切布陣分合衝擊進退隊伍技藝漸已整齊嫺熟八月初一日奴  
才永德前往該營將該軍操演戰陣鎗矛各項技藝逐一較閱畢於初九日旋口奴才詳察核該營練  
兵鎗矛技藝均爲嫺熟已有成效現屆冬初口外天氣寒涼紮營之地係在通衢大路水草漸稀轉瞬嚴  
寒冰凍草枯馬匹難資飽騰應即撤回各旗以息馬力第查口外沙漠之區山深野曠易於藏奸須有官  
兵梭巡以靖地方而安商旅奴才等擬將統帶幫帶營總各官減撤一半帶領現練之兵五百名各回本  
旗仍飭該總營等官隨時操演勿使生疏另由各旗備調額兵內揀選年力精壯者二百五十名送營備  
練所省之餉抵作現練官兵餼養馬匹津貼一俟明年節交夏令再飭原撤各官將新挑操練之兵二百  
五十名管帶來營仍歸兩翼操演如此輪換練馬力得以休息餉項亦可節省報聞○乙丑以廖壽恆  
爲內閣學士○劉長佑奏查劍川營原係駐紮州城於同治十二年間前雲南巡撫岑毓英奏麗江劍

川交界之喇雞鳴井係江邊要隘距州城三百二十里該處僻近頗遠莊從未設兵駐防商民每被劫搶請將該營都司移駐喇雞鳴井一摺奉 旨允准遵行在案茲據雲南鶴麗鎮總兵朱洪章維西協副將程友勝等稟稱查劍川城地當孔道五方雜處實爲進西扼要之區原設都司一營駐紮城防營制本極周慎旋因辦理喇雞鳴井鹽務將該營移駐井地暫資彈壓而劍川城守遠形空虛且井地相距州城三百餘里道路又甚崎嶇微特一有風警呼應不靈即平時運糧調操亦多不便現在井規已復商販相安應請仍循舊制將劍川營都司移回州城於營伍地方有裨等情當經札行雲南督後局移會迤西道遊委幹員覆加查勘據實稟覆去後茲據該局會同雲南布政使迤西道詳轉據委員麗江府知府積壽稟稱伏查劍川州城爲大理後路門戶上接鄧州浪穹下連麗江中維左控永北右通鶴慶形勢最爲扼要控馭未可稍疎喇井僻處荒山與劍城相距太遠從前移營原屬一時權宜之計近日井規已定行旅無虞所有劍川營都司應仍照舊駐守劍城以資鎮攝至該井瀕臨瀾滄江防禦亦不宜疎擬請將就近之吉尾汛移駐該井地面並由鶴麗鎮添撥弁兵與喇井汛不時會哨互通聲氣庶於江防亦免疎虞等情由司局核轉詳請具奏前來臣覆查劍川州城實屬緊要較之喇井輕重懸殊若令日久空虛殊非慎固防守之意合無仰懇 天恩勅部議覆准將喇井營伍移回劍川州城於地方營伍均有裨益下

兵部議奏○裕祿奏前准部咨同治元年十一月奏奉 上諭各省兵額例於年終題報嗣後各督撫務將存營兵數核實按限造報等因欽遵行令迅速照章具報在案伏查定例安徽省各營弁兵增減裁汰並安塘駐防馬匹數目向係按年造冊送部彙題自軍興以來各營弁兵久未歸伍冊檔全失致難依限造報嗣於同治四年六月初一日為始招募五城守兵所有安徽省應造五年新募五成兵數並六年募足守兵同新募三成步戰兵丁以及七年至光緒五年分應造安塘駐防弁兵實存各數均經由司按年彙冊詳請具奏咨部彙題並聲明現在安徽省兵數馬匹請俟復額時再行照例造報在案現准部咨行令現年清報除本年兵馬數目趕飭依限遵辦外所有安徽省應造光緒六年分各營兵數冊籍據布政使盧士杰彙造詳送前來臣查得安徽省各營額設兵丁九千四百四十二名內戰馬戰兵九百一十八名步兵一千七百三十九名守兵六千七百八十五名自遭兵燹失伍裁撤後於同治五六兩年兩次分飭安慶游兵潛山徽州寧國池州蕪萊廣德壽中縣右安廬州亳州潁州泗州並撫左撫右等十七營先行募足守兵六千一百四名三成步戰兵四百八十二名外宿州營全留兵八百七十八名其餘兵八百三十四名仍作守兵又同治八年新添龍山營准設兵八百名內應募三成戰兵四十八名其餘兵七百五十二名仍作守兵又皖南鎮營制案內將寧國營改為鎮標左營新設鎮標右營抽撥馬步兵丁均與通省額兵無

所增減已於光緒三年正月分起分別裁移歸併仍統俟通省各營招補馬步戰兵再行遞復原額以符舊制下兵部知之○丙寅雪○李鴻章奏前因口外張獨多三廳地方重要今昔煩簡不同請將理事廳員改爲撫民要缺張家口副將移駐多倫並酌撥營汛添設三廳捕盜弁官以資控扼業經吏兵等部覆准奉 旨依議欽此當即轉行口北道奎鳳宣化鎮總兵王可陞遵照迅將應辦事宜分條籌議茲據該鎮道會同議覆由藩臬兩司轉詳前來臣覆加酌核計列六條於左一三廳循舊兼管旗蒙事務查張獨多三廳所屬疆界多在察哈爾各旗蒙古游牧地面多倫廳兼有熱河克什克騰旗蒙古地面現改爲撫民同知而向有蒙民交涉事件責無旁貸應令廳員循舊兼管至察哈爾都統駐紮張家口所有駐防營糧餉商都太僕寺牧羣生息達里岡蓋等差費收支各款以及都署會審案件亦應令張家口同知循舊經理以符定制一張獨兩廳應酌添辦公經費查多倫廳額設養廉銀一千兩辦公銀二百兩又兼管稅務書吏役食等項另有作正開銷尚可敷衍張家口廳額設養廉銀八百兩無閏之年辦公銀二百一十一兩獨石口廳額設養廉銀八百兩無閏之年辦公銀七十五兩四錢九分照藩庫放欸章程減成給領所得無多該兩廳缺分較昔現既改爲撫民同知衝煩疲難四字要缺政務煩重倍於往昔若不酌添經費不足以資辦公應請將張獨兩廳每年各添給辦公實銀五百兩在於經徵升科廠地糧銀內留支仍



扣六分平解還滿庫其與多倫廳籌設養廉辦公俸薪役食等銀悉循其舊由司給領一移設多倫協營酌定營制兵數查張家口副將協標原有左右兩營守備兩員管轄馬步守兵六百七十一名內除已拔經制額外馬兵五名又調赴烏科兩城換防及調入練軍馬步守兵二百十七名現存馬兵三十二名步兵二百二十六名守兵一百九十一名共四百四十九名又千總把總經制各二員額外外委三員應令該守備兩員千把總經制額外九員馬步守兵四百四十九名均隨副將移駐多倫卽以多倫原有都司一員與移往守備兩員分爲多倫協標中左右三營遇有都司守備缺出一體由外不論滿漢分別升調請補中營都司應兼防閃電河二道泉兩汛右營守備應分駐經棚其土城子等處應分駐千把等弁俟撥定分汛另行咨部多倫原有馬步兵二百六十三名連移駐之兵共合七百十二名再暫撥宣化練軍馬隊一營交多倫副將管帶擇要駐紮分段梭巡卽責成該副將督率練軍嚴拿盜賊搜查諸家保護商民毋得玩愒其烏科兩城換防等兵二百十七名應撥歸張家口營都司管轄又張家口協標原有萬全營膳房係新河口堡洪馬林堡四營守備弁兵應就近改歸張家口營都司管轄柴溝營西陽河堡兩營守備弁兵應就近改歸懷安路都司管轄毋庸再歸多倫協副將兼管至獨石口協標除多倫一營閃電河二道泉二汛撥歸多倫協標外其餘營汛均循其舊無庸更改一守兵酌改步兵米折仍給十成

查多倫原定營制應設馬兵步兵不設守兵蓋因邊外要地守兵口糧太少不能得力也今將張家口協標左右兩營兵丁移駐多倫內有守兵一百九十一名既與多倫營制不符內地又無可抽換口應酌量更改然若爲馬兵則增餉較多應請將此項守兵一百九十一名均改步兵每月僅加餉銀一百三十三兩七錢仍由藩庫給發以裨操防至多倫距宣屬州縣五六百里不等不能遠道支領月米所有移駐各兵應照多倫原營定制均給米折銀兩俾歸簡便亦由藩庫撥給同所改步兵加餉統歸宣化鎮兵餉案內題撥惟現在藩庫放欸章程每米一石折銀一兩又按七成扣算僅給實銀七錢不敷買米之用且邊外寒苦與內地情形不同勢難過於克減致令枵腹應請自光緒七年冬季起多倫協標新舊兵丁米折仍復舊章以十成實銀給發以示體恤一三廳捕盜弁兵酌撥分駐查張家口廳原設烏里雅蘇臺太平莊兩汛現在開地甚廣以興和城爲要隘將烏里雅蘇臺汛千總改駐興和城作爲興和城汛千總烏里雅蘇臺汛卽以新添經制外委駐紮其太平莊汛仍循舊制所添馬兵三十九名分汛派撥又獨石口廳原設里河丁莊邱鎮二汛現開庫倫諸爾廠地係丁莊汛把總所管惟汛署距新開地五十里照管難周應將把總移駐庫倫諸爾廠卽將該處革商入官房屋一所作爲汛署另建仍名丁莊汛所添馬兵二十名與各汛酌量分添又多倫廳諸營以外均係各旗游牧地面且有多倫協分設營汛無須再撥捕盜

弁兵應將新設千把總外委各一員馬兵三十九名駐紮該營遇有盜案責令隨卽往拿平時分頭巡緝至此項新設千把總外委卽在張嶺兩總捕盜營把總外委目兵內拔補馬兵就地招募惟捕盜營與綠營情形不同嗣後遇有缺出應以捕盜營弁考拔新添弁兵均自光緒七年十月初一日補募齊全卽於是日起支廉俸餉乾一酌給移駐官兵盤費並建蓋衙署兵房經費查張家口協左右兩營備弁兵丁移赴多倫計程五百餘里該弁兵等所領俸餉僅敷糊口情形均甚困苦一旦攜眷遠徙盤費無出其日用器物有不能帶往者並須到防添置自應酌給盤費以示體恤今擬守備二員各給銀四十兩千總二員各給銀三十兩把總二員經制外委二員各給銀二十兩額外外委兵丁四百五十二員每名給銀十兩統計官兵盤費銀四千七百四十兩又多倫等處移駐官兵及添設捕盜弁兵必有衙署兵房以符體制而資棲息應建副將衙署一所估銀六千兩守備衙署兩所共估銀二千兩千把總署房四所共估銀二千四百兩兵丁四百數十名多係挈眷同往不能不分給住房應先酌蓋兵房三百間如有不敷再議添蓋每間估銀十四兩共合銀四千二百兩至多倫總應添建捕盜千總把總署房二所張家口總應添建捕盜千總署房一所共估銀一千八百兩張嶺多三屬均添捕盜兵房四十間共估銀五百六十兩三屬新添捕盜外委兵丁一百名每名給馬一匹每匹例價銀九兩共銀九百兩添置刀矛弓箭靴衣等項需

銀三百兩統計衙署兵房馬匹器械銀一萬八千一百六十兩連官兵盤費均請於現辦升科廠地押荒銀內支用惟建蓋衙署兵房工料銀兩均係約估邊外工料費昂又與內地情形不同應飭剋期核實撙節興辦工竣再行截數咨部以上六條均係因時制宜於邊要地方有裨得旨該部連議具奏○劉坤一奏臣於二十五日帶印出省初坐登瀛洲兵輪於二十六日至圖山關督同瓜州鎮吳家榜及統領合字勇之九江鎮章合才籌防局候補道楊儒陳鳴志等查看南岸頭磯橫壩明礮臺六座及磯上望臺一座均經完工極為堅整其橫壩明礮臺牆上所留缺口以便將來加蓋牆頂亦屬合宜惟北岸之東生洲與三江口因係浮土正在填築礮臺經臣訓催章合才期於年內竣事所需礮位亦已調撥齊全旋即轉至瓜州改坐炮船前進運河二十七日臣由揚州督同河工局之徐州道程國熙及陳鳴志逐節履勘運河隄工所有奏明自浦口以下由臣衙門承辦者東隄已一律告成其中如昭關壩車邏壩及上年所修新壩南關大壩等處工程甚為結實西隄則現修至高郵之楊家壩隄身寬厚鞏固臨湖一面加鑲斜坡密鋪碎石楊家壩以上惟馬家灣一千六百丈隄身尙屬完全碎石多有脫落該處在高郵州境內與清水潭對岸內係運河之脫處當湖水之衝不可不及時補葺楊家壩以下聞有已修之段其餘勢雖較緩亦不可不接續興辦以竟全局業經預備碎石九千餘方於西隄等處計足敷用此後每年霜降後巡察

一次有缺卽填有漏卽塞似可以無虞三十日行抵清江浦適現任漕運總督江蘇巡撫臣黎培敬條中風痰艱於言動臣因同淮揚道桂嵩慶現署徐州道之江安糧道張富年及程國熙陳鳴志等於九月初一日由陸前赴揚莊測度中運河及上年新挑舊黃河地勢高於順清河七尺中運河舊黃河水深一丈二三尺順清河水深二丈內外山順清河沿舊黃河南岸至吳城二堡及碎石河地勢亦高淪淪一線約深二三尺至四五不等由碎石河至張福河地勢漸底水深丈餘張福口轉至運口以及三閘則地勢亦低洪流奔瀾水深二丈七八尺至三丈二三尺此係要河廳所轄各處柴埭石土尙屬如法初二日由裏河廳交界之睢盱縣循洪澤湖石堤至高家堰高粱洲於黃堰寺照刻定尺寸測量湖水約深八尺隨迤智信林蔣四壩至仁義禮三河爲洪澤湖尾閘仁義兩河已廢僅餘禮字一河係全湖關鍵上年新築越壩挺入河心極爲著力現於所留替河測量水勢深至二丈有奇壩外尙須鑲鋪斜坡碎石以禦風濤而資捍禦沿湖石堤徐嶼十六堡已經修竣取濶十八堡甫脩十七十八兩堡就中察看惟十六五十四十二四堡尙須大脩其餘堤外已經淤高只須量行粘補上下尙須多用礮石易於收功臣此次周歷河湖而知淮揚堤工水利誠有關於國計民生前議導淮未可淺嘗中輟惟就現開引河分別疏濬深通似覺微有把握正不必棄舊圖新去易從難另開河道以致曠時糜費也臣謹爲 皇太后 皇上縷晰

陳之淮揚地勢低窪以一隅受山東河南安徽三省之水號爲澤國而清江係南北往來衝衢通泰九州縣戶口百萬田畝百萬兼以鹽場二十處每年出產頗豐所以制漫溢之患收漕輸之利者全賴洪湖長堤障之俾無踰閘南運河東西兩堤束之使其順軌而又設閘涵洞以時啟閉而資蓄洩實屬善法良爲萬世所宜遵守我朝歷懷民膜庾次動帑興修不惜鉅款其爲地方計者至深遠矣惟是滄桑迴異要在酌盈劑虛自揚莊以下蘄黃河淤平則山東昭陽微山等湖之水由中運河直趨南運河夏秋之間三閘甚形喫重自洪澤湖淤淺淮水不能合溜而後北高於南形如側壺水之分入張福引河者無多大溜山禮字河徑趨高寶等湖南運河東西兩堤岌岌可危於光緒四年近事可爲明鑒迨至冬春水落則中運河水之入順清河洪澤湖水之入張福引河者均屬涓涓不獨鹽運維艱卽漕運亦虞遲滯上年挑潒黃河後山東蛟水屢次暴發由此分瀉入海南運河水得慶安濶築禮字壩後湖水漸深淮北鹽船得以浮送商民稱便且由張福河水入運口者頗旺本年漕運亦得鼓棹而行毫無阻梗此挑潒黃河築禮壩之不無微效也惟是張福引河淺溢洪湖之水仍屬趨重禮河越壩終爲可慮蓋洪湖出路只此兩者此形其少則彼形其多因爲事所必至倘遇湖水氾濫禮河卽無越壩亦難分消必開智信兩壩由高寶湖入南運河則南運河亦必開車避南關等壩山裏下河入海沿途淹沒田廬所損匪細臣固以爲導

淮末可竟止然必另開引河無論糜費不資亦覺諸形格礙今擬就張福河開挖寬深以引洪澤湖之水得挖碎石河以分張福河之水由吳城七堡匯於順清河如水小低於中運河則由順清河入運途紆而勢稍舒水大高於中運河則由舊黃河入海途直而勢自順洶爲兩全之策約計以一二年開張福引河一二年開碎石河及吳城七堡三四年間便可告竣每年動工必須冬春水涸爲時不過三四月之久所費尙不過鉅議者或謂導淮入海當盡濶洪湖之水有妨官運民田臣愚以爲導淮如果另開引河或不免有此患今循張福河碎石河故道以歸順清河平日涓滴皆入運河自非淮水暴漲一二丈則順清河之水何能高過中運河溢出舊黃河如使淮水暴漲汪洋澎湃方有潰決之虞惟恐水無去路此正導淮之本意也議者或謂多引湖水以入運口恐三閘受其激刷不能支持不思洪湖未淤以前湖水四平蓄水深廣張福河以外有引河四道以濟漕運維時黃河尙未北徙每遇漕船過閘方且蓄清敵黃以五道引河全注運口而三閘屹然今特濬張福引河一道決無致損三閘之理且上年挑通舊黃河分減中運河水已六七成其入南運河者不過三四洪澤湖之水雖增與前此水之淺深大略相等將來卽遇大水有舊黃河可以分減亦不至專出三閘也議者又謂如此導淮無弊亦屬無利何必虛費帑藏其說亦不盡然夫治水之道必須通盤規畫因地設施並須預防變遷熟籌方略洪湖南有禮字河北有張福河均

爲分洩淮水而水勢就下禮字河常苦水大張福河常苦水小築禮河壩所以蓄張福之水潴張福口所以顧禮河之堤彼此互相維繫如使禮河全受湖之冲新壩恐不能保續修則所費糜鉅不修則爲害滋深下者益下高者益高張福河漸形壅閉矣且導淮之舉原防淮水盛漲之初肆虐之際如引湖水由張福河出順清河以爲黃河爲入海之路即使偶有泛溢該處土曠人稀趨避尙易若張福引河不暢全湖之水折而南趨則淮揚一帶繁盛之區億萬生靈將有其魚之嘆然則導淮之利見於目前者猶小見於日後者乃大也自揚莊以下舊黃河目前分瀉中運河之水將來分瀉洪澤湖之水上年業經節節挑挖此後每年只須修理卽安東阜甯兩縣百姓亦得以舟楫謀生臣擬以導淮之事及禮壩另加外堤責成淮揚道桂嵩慶徐州道程國煦以資熟手惟該道等各有職守擬另派道府大員駐工經管以便稽查勘估開河一切皆取裁於桂嵩慶程國煦兩人其每年修理舊黃河則專責成桂嵩慶就近照料所需經費業經臣奏明動撥淮北鹽釐自揚莊以下舊黃河尚有四百餘里之遠應否酌設河員數人容臣會商漕臣督飭桂嵩慶等核議具詳另案奏辦得 旨該部知道○己巳 慈禧端佑康頤昭豫莊誠皇太后萬壽聖節 上詣 慈禧宮行禮○榮毓等奏請酌獎守衛 曹祥峪 定東陵各司員得 旨德衡額著賞加二品頂戴懿綿著賞加武備院卿銜○定安等奏本年九月初二日准盛京刑部咨據刑部議擬御



史胡隆洵奏擬將盜犯就地正法章程先行停止請飭各省督撫將軍都統府尹體察地方情形將夥衆持械強劫案件仍照成例解由該管上司覆勘題奏不得先行正法迅速妥議具奏等因素 旨依議欽此欽遵咨行前來奴才等捧讀之下仰見 聖主於除暴安良之中仍寓慎重人命之意伏查拿獲盜匪就地正法原期辦理迅速俾令觸目警心誠屬輯亂權宜之計並非經久良圖惟黑龍江省地處邊陲幅員遼闊所轄呼蘭巴彥蘇蘇北團林子三處南與吉林接壤東北兩面皆係山林時有馬賊什伯爲羣乘間竊發必須隨時嚴加懲創庶足以戢兇暴而靖閭閻查同治八年奉 上諭都興阿奏奉天股匪橫行雖經迭次剿除仍未淨絕等因欽此歷經遵辦在案又同治十三年刑部議覆御史鄧慶麟奏軍務肅清省分拿獲盜匪照例辦理一摺請 旨飭下各省體察情形應否規復舊制妥議具奏等因當經前署將軍依克唐阿以黑龍江毗連吉林盜賊不時竄擾奏請各屬拿獲強搶兇暴衆著者仍照章訊明就地正法其尋常搶奪情節較輕者仍照舊制分別定擬咨部辦理荷蒙 硃批允通飭遵辦亦在案奴才等到任後將操防各營擇要分布嚴飭實力搜捕雖經隨時戮戮迄未盡絕根株刻經和衷商榷並飭屬悉心核詳如將辦理盜匪章程一律改歸舊制屬解勘不特兇悍之徒轉得日久穰誅更恐長途曠遠護解爲難兼之羣聚固圍難保不變生意外不足令其觸目警心亦殊非辟以止辟之道況江省辦理盜匪向

係由省核明供招情罪毫無疑議始行咨令就地正法一面彙案奏聞咨部如案情微有未協仍卽提省審辦未敢稍涉草率奴才等再四體察情形實係驟難歸復舊制議請嗣後各屬拿獲盜匪除尋常搶奪情節較輕者仍照定例擬解外其餘馬賊土匪持械強搶兇暴聚眾者仍遵前次諭旨並奏定章程一經審明將供招送省覆核無異咨令先行就地正法彙案奏聞咨部一俟盜風稍息再行奏請改歸舊制庶兇頑或知斂跡而辦理亦昭核實矣得 旨如所請行○庚午劉長佑奏雲南昭通府屬界連川黔道路叢雜山深箐密向爲橫匪會匪及各教匪出沒之區疊經臣等檄飭該郡文武嚴密防捕並派副左及新副左兩營練軍駐紮永善鎮雄等處准由鎮府隨時調遣協同兵團備禦巡防在案茲於九月初五日接據昭通鎮總兵麟志昭通府知府景維稟稱探有外來匪徒出沒山箐潛謀滋事稟請籌辦等情臣等當飭該鎮府會派員弁督率兵團認真查緝並飛飭察看情形緩急酌調練軍會營巡哨因地布防去後續據該鎮府會稟探得該匪潛集灑漁河一帶勾結黨羽勢將益勦因飭著恩安縣知縣陳葆猷同中營游擊張宗久率帶兵差於本月二十三日前往查辦忽於二十七日寅刻探報土匪叩招祥陸松山等勾結匪黨一千餘人數路並進來襲郡城等情該鎮府當卽飛調候補副將涂開科等帶兵二百餘名出城堵剿一面督同在城官紳各率兵團分布四門防禦該匪已至城外揚旗執械直撲郡城西北兩門經副

將涂開科等率眾迎擊維時天尚未明變起倉猝賊勢披猖虛實莫辨涂開科等眾寡不敵勢甚危險該鎮親督參將林春芳游擊朱名祿千把鄭榮毛文應謝文斌顏桂芳辛開陽王應泰張致和程大益朱兆麟袁廷蘭胡希廷等分出策應力戰逾時涂開科奮勇爭先手刃悍賊數人並將匪首引招祥格斃各將弁紳團乘勢奮擊殺斃甚多賊始敗竄惟匪首陸松山猶率餘黨拚死拒戰涂開科等正在相持適游擊張宗久知縣陳葆蘇趕至攔途截擊城外紳團將各街口堵住該匪左衝右突奔逃無路首夥悉就殲除其遠在城外山上准備接應之匪尙數百人一時望風退散該各將弁紳團四路追捕殺斃尤多當兵團未集眾情怱遽之時有匪數十人混跡入城欲赴文武衙門放火內應隨經兵團查悉捕斬無遺查點郡城內外匪尸共三百六十餘具奪獲器械無數惟中軍游擊張宗久中軍把總程大益額外楊來本宋綬受傷太重同時陣歿差弁兵役均有傷亡昭通鎮麟志右手昭通府景維左膀亦各於督戰時受有微傷等情並將搜獲該匪偽示附呈前來臣等當即檄飭該鎮府激勵兵團捕拿餘黨一面發給諭札剴切開示務在解散竊從安撫良弼以靖地方並令將該匪等由何處糾集起事由何處分股撲城暨游擊張宗久等受傷陣亡情形均卽查明剋日據實詳報核辦一面由省札委候補道許繼衡督帶副中營練軍馳往該府會督查辦所屬地方現在有無復聚股匪在境滋擾其積年著名積匪會首現尙有無負隅抗官

實跡均卽分別捕拿務除後患 上諭劉長佑等奏昭通土匪滋事立即撲滅現在派員查辦一摺據稱雲南昭通府屬突有外來土匪叩招祥陸松山等潛跡瀾滄河一帶勾黨千餘人分路毀破郡城並有匪徒混跡入城欲圖放火經官軍攔截捕斬首夥悉數殲除等語著劉長佑杜瑞聯卽飭官軍暨地方文武迅將餘匪搜捕淨盡並將積年著名匪首悉數捕拿毋任勾結爲患此股匪徒究竟如何起事務將實在情形詳悉查明具奏不得稍涉掩護○色楞額等奏前據駐防察木多游擊馬應祥稟稱據察木多大呼圖克帕克巴拉等公具稟稟譯漢內稱舊倉儲巴帕克巴丹增辭退遺缺據選舉洛布策旺充當從前勘辦贖對案內我察木多寺院頗著勤勞蒙 大皇帝天恩賞給達爾漢堪布名號准倉儲巴承襲在案今懇照案准襲等情當經前大臣松淮咨請理藩院示覆本年正月十九日接准咨開西藏應襲應放僧俗各官向由駐藏大臣隨時奏明辦理前議獎勵贖對案內倉儲巴帕克巴丹增係請賞承襲達爾漢名號並無堪布字樣應由該大臣自行辦理等因復經奴才等札飭察木多糧務游擊會同確查稟覆核辦去後茲據該糧務熊錫恩游擊馬應祥稟稱查明辭退倉儲巴帕克巴丹增實係承襲達爾漢名號並無堪布字樣前次繙譯錯誤應請免究仍懇准現在倉儲巴洛布策旺承襲等情前來奴才等未敢擅專可否將察木多商上新充倉儲巴洛布策旺援案 賞給達爾漢名號之摺出自 逾格鴻慈得 旨

該衙門議奏○定安等奏前因呼蘭所屬地面遼闊水陸交衝加以該處招墾流民雜聚其中良莠實屬不齊是以搶劫之案層見迭出呼蘭雖有演練步兵均置隘要操防距鄉村爲遠倘有警報到則賊已遶颺故特撥省城所練馬隊五百名前往該處居中鎮懾以操爲防等因奉 諭旨允准在案嗣據呼蘭副都統博棟阿咨報據委協領鄂奇斯渾馬隊練軍統領博爾托晉呈稱閏七月初十日青山竄出馬賊七八十名在疙疸山丁家崗子一帶擄掠焚燒當經該營委佐領德升額馬隊營總伯昌帶領官兵會勇馳往剿辦追至姜家威子等處遇賊接仗先後擊斃賊匪三十餘名生擒賊目蔣得芳夥匪閔八狗爾汪奎三名餘匪潰竄入山訊據獲賊等供稱此股賊匪係藍洛穆痘王洛疙疸二人今年夏間竄伏青黑二山陸續嘯聚黨與六七十人又賊目蔣得芳由江南糾結夥匪六人沿途劫掠馬匹潛過江北竄入蘭境地方搶掠雙河鎮大成興鋪戶財物復竄至姜家威子始入藍王二賊黨內今遇官兵追剿被擒等供不諱當於訊明後就地正法查點官軍陣亡會勇四名受傷兵丁七名奪獲驛馬三十餘匹火鎗十餘桿刀矛四十餘件當將驛馬分賞出力兵丁軍械存營使用等因咨報前來奴才等詳查呼蘭巴彥蘇蘇地面與吉林二姓金廠祇隔一江彼拿此竄勢必蔓延過江況界連青黑兩山竊爲盜賊淵藪因山路崎嶇樹木叢密馬隊不能入山窮追故每值夏秋賊匪結黨乘隙出沒在所不免此股賊匪雖經官軍剿捕究

未悉數殲除隨即飛咨呼蘭副都統嚴飭各軍迅速實力躡拿務將在逃餘匪全數弋獲以盡根株而安  
黎庶報聞○辛未恩福等奏本年秋季派委統巡城守尉奕潯與朝鮮官金鳳求公同會哨邊境肅靜報  
聞○頒給臺灣各屬 天后神廟匾額○賞給通州王恕國等處粥廠利米八百石○予直隸朔州孝婦  
王孔氏文安縣烈婦薛崔氏等旌表○慶裕奏據署廣西按察使慶愛詳稱據西隆州知州龔啟藩稟稱  
該州地方遼闊由州城東至義華計九站西至板橋計五站設使兩處命盜案件同時並發則印官奔馳  
往返勘驗必須一月程途向來分設八達州同一員歸州州判一員專司糧捕等事所以助印官之不及  
也伏查例載廣西東蘭州屬之那地土州凌雲縣屬之天我咱去州縣城在三百里以外及全州屬之西  
延州同西隆州屬之八達州同玄州城一百里以外之盜案准令分駐州同州判縣丞會同營汛前往代  
勘錄供送交該州縣承審如有查勘不實照例議處其東蘭凌雲玄州縣不及三百里全州西隆去州不  
及一百里之盜案仍由該州縣自行往勘又例載廣西東蘭州之那地土州凌雲縣屬之天我咱地方去  
州縣城在三百里以外及全州屬之西延州同西隆州屬之八達州同去州城在一百里以外之命案准  
令該處州同州判縣丞帶領練達吏前往代驗填格取結送交該州縣承審如有勘驗不實照例議處  
其東蘭凌雲去州縣不及三百里全州西隆州去州不及一百里之命案仍各照舊例辦理各等語是該

州一百里之八達州同遇有命盜案件本有代勘代驗之責惟舊州州判遇有命盜案件應否代往勘驗例內並無明文檢閱該州志書康熙五年改流後設立知州州同州判吏目各一員康熙三十七年剿平八達逆目顏光東將州同移駐八達是年奉文裁汰州判一員移防千總一員追嘉慶二年黔苗滋擾奉文復設舊州州判一員自是以來並無更易查八達州同在州西南陸路一百十里舊州州判在州東陸路一百六十里各有該管地段兩不相涉該州地處僻遠所有舊州州判該管地方遇有命盜案件似應倣照州同之例卽由該州判代往勘驗以期迅速而免耽延現部中纂修則例之期稟請達部將例文酌核添纂俾資遵守等情由司具詳前來臣查州縣印官遇有命盜等案例應立即馳往勘驗不容稍事稽延蓋命案以屍傷爲憑盜案以踏勘爲據一有耽擱難免別滋弊端是以距州縣遙遠地方定例分別由該處州同州判等官代往勘驗仍送交該州縣承審以期迅速而昭慎重西陸州屬八達州同距州百里以外者既可照例勘驗命盜案件而舊州州判亦係距州百里以外且與州同各有分管地段兩不相涉擬請倣照州同之例遇該州判分轄地面有命盜案件卽令該州判代往勘驗分別錄供填格取結送交該州承審以免耽延下部議奏○金順奏奴才於上年春耕時飭派署後路金營翼長花翎儘先卽補前鋒參領副前鋒參領喀勒克伊爾辦翼長記名簡放副都統一品銜護軍參領德克津布錫伯營領隊

大臣果樞察哈爾營領隊大臣喀爾莽阿等帶領官兵在塔爾巴哈臺並安集海所屬之南五工暨博勒塔拉三處播種小麥二千三百六十斛高粱七十一斛大麥一百一十三斛豌豆三十三斛穀子七十三斛稻子五十斛令其乘時灌溉妥爲經理秋成時督率官兵趕緊收割至九月間始將各色軍糧陸續收竣計共收穫小麥四萬六千三百二十八斛內除籽種外實得小麥四萬一千二百六十八斛收穫高粱一萬一千七百零四斛內除籽種外實得高粱一萬一千六百三十三斛收穫大麥三千零二十一斛內除籽種外實得大麥二千九百零八斛收穫豌豆二百一十四斛內除籽種外實得豌豆一百八十一斛收穫穀子一萬零六百六十三斛內除籽種外實得穀子一萬零五百九十斛收穫稻子八百五十斛內除籽種外實得稻子八百斛以上各色糧石均勾核計收成二十六分有奇除此次工作官兵等需用口糧並幫工稿費及添補農具等項其收穫各項糧石均令儲倉接濟軍食查上年各色糧石收成異常豐稔所有該官兵等東作耕耘西成刈穫均各胼胝辛勤始終罔懈不無微勞足錄自應仍照歷辦章程擬請分別保獎以策將來謹將尤爲出力人員另繕清單恭呈 御覽合無仰懇 天恩俯賜允准以昭激勸得 旨該部議奏○癸酉調廣壽爲吏部尙書志和爲兵部尙書以麟書爲理藩院尙書烏拉喜崇阿爲左都御史○轉奎潤爲吏部左侍郎兼署戶部左侍郎調錫珍爲吏部右侍郎崇禮爲戶部右侍郎以



寶廷爲禮部右侍郎○以鍾桂爲大學士文煜協辦大學士○李鴻章奏臣於光緒二年十一月會同前南洋大臣沈葆楨等奏明選派閩廠前後學堂製造學生十四名募徒四名駕駛學生十二名分赴法國官廠英國水師學堂鐵甲兵船學習製造駕駛之方及臣陳出新練兵制勝之理所需經費由閩省額撥南北洋海防經費內酌提動用旋議定閩省撥金項下籌銀四分之一閩海關洋稅及船政經費項下各籌撥銀四分之一按照章程分年隨解該學生等出洋後均能悉心考究窺見門徑雖所造深淺不同尙不爲故步所域多已學成期滿陸續回華其駕駛學生出色者則有劉步蟾林泰增等製造學生出色者則有魏瀚陳兆弼等經臣等量材器使或派管駕蚊船快船或在船政差遣及派往外洋爲鐵甲船監工其餘亦分任要務各効所長惟現值整頓水師研精船械規模日擴事事需才尤覺不敷分布臣李鴻章於光緒五年會同沈葆楨奏明閩廠出洋生徒應予蟬聯就學以儲後起之秀而備不竭之需奉 旨允行在案查船政前後學堂生徒初次選擇三十人出洋已拔其尤其續入學堂者年資稍淺遴選較難然育才之要宜使迭出而不窮日新之功不可一得而自盡臣鴻章與臣兆棠往返咨商擬定續選前學堂學生八名後學堂學生六名出洋肄業並擬分撥經費銀十萬兩陸續解出使大臣兼肄業監督李鳳池收支並請由出使英法大臣會紀澤會同督率照料惟查後學堂學生內有許兆箕等四名先經臣鴻

章調赴天津派充水師學堂教習及威遠練船教練水手皆有要差礙難遽令出洋現計後學堂學生僅有二十名合之前學堂學生八名共有十名先行儘數派員送至香港登舟出洋餘俟選擇得人續派前往所需經費仍應由福州將軍及福建督撫與臣兆棠查照成案分年勻撥接濟下所司知之○甲戌諭昨經降旨將寶廷補授禮部右侍郎茲據奏稱自維歷練未深恐難勝卿貳之職請收回恩命等語寶廷遇事尚屬敢言其有可採擇者無不立見施行現經擢用侍郎正以資其歷練非徒予以寵榮朝廷因材任使一秉至公該侍郎惟當勤慎供職勉圖報稱所請收回恩命之處著毋庸議○諭軍機大臣等總理各國事務衙門奏法人謀佔越南北境并欲通商雲南擬籌辦法各摺片覽奏均悉越南向隸藩服為前粵兩省屏蔽法人據其西貢一帶現復以東京捕盜為名添置兵船并欲由紅江通商雲南計殊巨測該國積弱已久若任其侵削則滇粵藩籬盡為他族逼處後患不可勝言總理各國事務衙門所奏與李鴻章籌商辦法即著李鴻章左宗棠劉坤一張樹聲劉長佑慶裕杜瑞聯商同密為妥辦其丁日昌會紀澤致該衙門各節一併參酌辦理務當詳加揆度合力圖維庶可弭釁端而安邊境并將如何辦理情形隨時詳晰密陳會紀澤屬與法國外部辯詰仍著堅持前議相機辯論期於大局有裨原摺片均著即鈔給閱看將此密諭左宗棠會紀澤并由五百里密諭李鴻章劉坤一張樹聲劉長佑慶裕杜瑞聯知之○乙

奏頒給浙江省城文淵閣匾額並著武英殿頒刻平粵匪方略一部交浙江巡撫祇領尊藏○譚鍾麟奏  
浙省防勇舊存九營去年募足二十營餉若不足自當陸續撤減現已遣散四營除派往溫台捕匪七營  
俟事勢大定再行酌減外餘擬每營裁勇丁百名以紓餉力練軍十營擬留溫州海門定海各一營提標  
兩營省城一營其餘悉令各歸汛地防守報聞○丙子譚鍾麟奏據甌海關監督溫處道溫忠翰詳請各  
口新設洋關辦理洋務俱於例銷關卡經費之外另支監督薪水銀兩溫州關開辦之初因洋稅寥寥一  
切經費力求減省而合計一年收數尙屬不敷開支由甯關撥補是以監督薪水一欸亦未議定現在逐  
年整理稅務日漸起色公事較繁一切辦公經費亦較從前倍蓰竊慮力難賠墊聞九江蕪湖等關月支  
關道薪水銀二百四十兩溫州事同一律應請援照成案提給等情詳請奏咨前來臣查甌海關爲添設  
通商口岸事務紛繁辦公經費在所必需近來交涉事件較多收稅漸有起色所稱用欸較鉅力難賠墊  
係屬實情相應籲懇 天恩准照蕪湖等關成案月給監督薪水銀二百四十四兩作正開支以資辦公  
允之○丁丑諭御史載彩奏倉匪巧於避就請飭嚴究並稽查該匪弊暨倉摺片據稱倉匪唐蔭亭拿獲  
到部供詞捏飾避重就輕並有賄託關說情弊著刑部堂官遴派廉幹司員秉公嚴訊確情毋任狡展並  
著倉場衙門認真稽查倘唐蔭亭唐順成等於太平倉仍有暗中影射把持等情卽行從嚴查辦以清弊

端○畿閑散宗室覺羅人等兩月錢糧加歲宗室覺羅孤寡一月錢糧○畿京師八旗綠步各營官兵一  
月錢糧○庚辰諭楊昌溶奏請將貪劣知縣革職一摺甘肅秦安縣知縣敖思猷於地方應辦事宜不思  
振作且有藉端浮收勒索等情實屬貪婪不職著即行革職以肅吏治○諭巡視東城御史阿彥  
泰鄧承修奏職官捏遞匿名書信請飭究辦一摺據稱商人侯治銘喊告韓大欠伊錢文訊據韓大供係  
代伊鋪東戶部郎中舒文借用正將韓大押究突有人赴鄧承修寓所投遞書函稱係恆宅送來拆閱並  
無姓名情詞詭幻經該御史覆訊稱係舒宅傭工袁貴主人舒文交給書信令其飾說投遞等語案關職  
官牽涉訟事復捏遞匿名書函虛實均應澈底根究所有遞書人犯袁貴鋪夥韓大及全案人證均著解  
交刑部嚴行審訊郎中舒文著聽候傳訊○辛巳諭繼格畢道遠奏全漕告竣請將出力員弁獎勵並請  
將前保各員改獎各摺片本年江蘇浙江海運山東江北河運漕白糧米及奉天額運米豆先後抵通經  
繼格畢道遠督率坐糧廳等驗收完竣辦理均無貽誤繼格畢道遠均著交部議敘所保出力及改獎各  
員著該部議奏○銘安等奏查雙城堡舊設協領一員駐守辦理旗務追咸豐元年前將軍固慶等以該  
處丁戶日密公事紛繁奏准將協領裁撤改為請 旨簡放副都統銜總管一員總攝其事以專責成近  
年該堡生齒益繁商賈輻輳戶婚田土詞訟滋多必須添設民官明刑勸教亦能有裨地方今就雙城堡

拉林兩處地勢而論其正北直抵松花江過江爲黑龍江呼蘭界其西北西南均與伯都訥屬接界其東南則與新設之五常屬接界其東北則與新設之賓州屬接界是界外均有屬官治理獨該處未免向隅奴才於札派差委道顧榮熙赴雙城堡訪查總管清瑞被參各款時面諭該道就近體察情形據實稟報茲差竣回省稟稱該處居民聞有設官之說情詞極爲欣慰等語如於雙城堡地方添設撫民通判一員加理事銜並於拉林地方添設分防巡檢一員俾兩處旗民皆得就近治理且與界外各屬壤地相接亦不致政教兩歧現已派員前往查勘應如何設官建署再行另摺奏 聞伏思雙城堡既擬設立民官地方一切事宜歸其經理仿照伯都訥屬長春廳舊章稟由奴才衙門核辦而總管無所司事且其職分較崇與屬官同城辦事亦多窒礙照五常堡之制仍於該處改設協領一員專司緝捕及一切旗務以昭畫一而免牽掣現在雙城堡總管清瑞因案避 旨查辦自有應付處分所有總管一缺可否暫緩 簡放奴才委派協領先行護理之處恭候 聖裁得 旨如所請行○銘安等奏 等前經奏派三品銜調吉林差委知府李金鏞辦理琿春招墾事宜茲據李金鏞稟稱前稟四十八處開荒清摺內有土門江北岸由下嘎牙河至高麗鎮約二百里此次前往查勘由下嘎牙河起盤躋嶺度越數嶺直至高麗鎮北岸止計有開荒八處前臨江水後擁羣山荒僻深奧向爲人跡不到之區卽本地農民亦從未深入該處與

朝鮮一江之隔該國邊民屢遭荒歉或被江水淹沒無地耕種陸續渡江開墾現查已熟之地不下二千  
响該國窮民數千人賴以餬口有朝鮮咸鏡道刺史發給執照分段註冊並據該國穩城府兵官趙秉稷  
面稱沿江之民半多仰給於北岸彼民自知越界墾種但求格外施仁等語事關邊界出入不敢不據實  
上稟應如何清查安插之處稟請核辦前來等查吉林省與朝鮮毗連之處向以土門江為界今朝鮮貧  
民所墾開荒在土門江北岸其為吉林轄地無疑邊界曠土豈容外藩任意侵占該國咸鏡道刺史發給  
執照殊屬錯誤現經李金鏞查明該處實係邊山阻隔為中國官民所不到該國寄居之戶墾種有年並  
有數千人之多薄海窮黎莫非 天朝赤子若照例嚴行驅逐出界恐數千無告窮民同時失所殊堪憐  
憫等仰體 聖朝綏來藩服一視同仁之意擬請 飭下禮部咨明朝鮮國王由該國派員會同吉林  
委員查勘明確劃清界址所有該國人民寄居戶口已墾荒地合無仰懇 天恩俯念窮民無所依歸准  
其查照吉林向章每响繳押荒錢二千一百文每年每响完佃地租錢六百六十文由 臣銘安飭司給領  
執照限令每年冬季將應交租錢就近交至瑯春山放荒委員照數收納或由該國派員代收一併彙交  
以歸簡易或該國鑄錢不能出境議令以牛抵租亦可備吉省墾荒之用其咸鏡道刺史所給執照應即  
飭令收回銷毀免致兩歧如蒙 諭旨允准後由 臣派員會同朝鮮委員秉公核辦詳議章程妥為安插

以清界址而示懷柔下部議奏○壬午李明堪奏苗疆文風日盛請添設鳳凰乾州永綏三屬及保靖縣  
陳增各額以勵人材下部議奏○甲申諭御史陳啟泰奏大員凱法徇私請予罷斥一摺據稱本年秋間  
兵部有題缺郎中以鄧天符擬補吏部尙書萬青藜以其婿李邦楨急於得缺授意司員妄稱鄧天符不  
合新章經兵部引案駁回遷延不撥迨兵部續有缺出李邦楨有缺可補始援案照准等語吏部辦理此  
案似於前後兩歧是否萬青藜有背公徇私情弊著都察院堂官查明據實具奏○軍機大臣等欽奉  
慈禧端佑康頤昭豫莊誠皇太后懿旨壽莊和碩公主著管封爲壽莊固倫公主並賞坐黃輪榮壽公主  
著管封爲榮壽固倫公主○允吉和回籍養親以古尼音布爲杭州將軍調珠爾遜爲歸州副都統○以  
德克吉額爲鑲紅旗蒙古都統○予京師兵丁借支應扣庫銀展限兩月○上諭 太廟行禮○諭京察  
本古三載考績之意舉劾並行任缺毋濫歷朝 聖訓不啻誥誡再三所以激濁揚清典至重也其保列  
一等人員經朕察看材堪任使者特予記名以備簡擢外任今日之道府以異日之藩臬亦卽將來之督  
撫若道府半屬平庸則封疆兩司將有乏才之患安望吏治日有起色乃近來每屆京察各衙門堂官往  
往視爲故事祇求一等如預其衰庸怠惰之員概列之二三等中不肯振奮參劾卽保薦各員其中爲守  
兼優足備任用者固不乏人而才守平常遷就應選者亦復不免是豈朝廷澄敘官方之意耶本年又屆

京察之期各部院堂官均受國厚恩務當精白乃心秉公考核用收得人之效不得有舉無効博寬厚之名亦不得拘定足額蹈濫等之弊當此時勢多艱需才孔亟大臣公忠體國首在以人事君若不力戒因循共圖整飭將來查有瞻徇情面濫保劣員及應効不効等弊惟各該堂官是問勿以諄諄訓誡爲具文也將此通諭各部院衙門知之○諭國子監司業王邦華奏水患情形甚重請飭查勘辦理一摺前據李文敏奏江西太和廬陵吉水等縣本年七月間被水情形業經降旨飭令妥爲撫恤茲據該司業奏稱廬陵吉水太和永豐四縣七月十八十九連日大雨山水暴發沖沒田廬淹斃人口無算災區甚廣民間蕩析離居棲身無所病斃者又復不少等語覽奏殊深軫念著李文敏督飭所屬認真籌辦撫恤毋任一夫失所仍將現辦情形隨時奏明以慰座系並著將該縣被災處所據實查勘其應行分別蠲緩之處奏明辦理用副朝廷矜恤災黎至意○都察院代上景山官學教習王開運摺稱微臣恭閱邸鈔伏讀本年六月十六日上諭各省防軍歲需餉項甚鉅各營撫統兵大臣將所部各營嚴行稽核選派得力將弁督帶申明紀律汰弱留強俾成勁旅倘有不加訓練不講營規虛報空額吞蝕口糧諸弊一經發覺定卽重懲以上各節均須實力奉行不得視爲具文一味粉飾因循致負委任總之時事多艱全在中外大臣共矢公忠實心任事破除成見以期宏濟艱難朝廷進退大臣惟視其能否盡職以爲考核其各時加惕勵



庶幾恩眷長承也至用人行政時有缺失凡有言責諸臣尤當直言無隱藉資採擇用俾治理實有厚望焉等因欽此仰見 聖朝軫念軍國諄諄誥誡之至意微臣卑職本無言責何敢僭越指陳利弊惟念

聖主勤求治理區區愚忱有願為芻蕘之獻者竊維 國初以來迄於雍乾嘉道年間非不時有兵役而度支餉項總不出正賦而外自咸豐初年以至於今每年軍需除正賦不計外歲增撥金洋稅捐輪鹽課各鉅款而猶時形奇絀每須借貸 國家二百餘年糜費軍餉未有至於斯極也然當多事之秋軍營浮濫支銷誠有不能顧惜者今肅清已久各路既不能全行遣撤若仍照從前對仗行營浮濫支銷不早裁減虛冒禁革弊端變通核實汰兵補勇以節帑項而計久長微但 國計民生永無充裕之日倘此後事有意外征兵則有名無實餉則有加無已取之庫款則已空勸之閭閻則已竭毒肺救飢又恐害將吏甚言念及此誠不知何以待之此微臣自思愚賤日夜焦思不敢引避嫌怨謹就管見所及敬為 皇太后 皇上縷晰陳之冀可補救萬一也查各省陸路防軍支銷款目不一其可裁減者約有四項各軍營實不一其宜嚴禁者約有四端各軍虛實不一其應變通者約有四事所謂可裁減者一曰各項人夫各省從前招募馬步練勇以為應敵之軍每一營正勇或三百數十人或五六百人不等每營或分為四哨或分為五哨六哨每哨或分為八棚或為十棚每棚正勇或八人或十人每一棚另有火夫一名搬運帳

棚錮鍋行糧等項長夫二名又一營有礮夫子藥夫共數十名而總統分統營官又各有公長夫數十名以供搬運軍需之用合計馬隊一營夫一百餘名步隊一營夫二百餘名每名月餉銀三兩或三兩三錢不等凡皆爲軍臨前敵或追奔逐北必須隨同搬運輜重而設若戍守防軍勇丁安坐無事獨不能自造一飯自餽一馬卽間有操演儘可輪流更換扛擡鎗礮配帶子藥如必事事責之各項人夫而後能行則勇丁之懈怠無用可知允宜悉數裁汰何況乎總統分統營官無事之日安用此親兵護勇各數十名藉資保身既已多立支銷名目則聽差効用人已有餘而此帳棚文卷油燭柴炭非有征調安然不動設此搬運公長夫各數十名將安用之姑不必問其真有與否徒爲虛冒名糧之目也卽偶或有之以抵不足之勇額恐十不及一竊以爲每營各項火夫棚夫礮夫子藥夫公長夫或百餘人或二百餘名虛冒太甚此可裁減者一也二曰各項公費軍有總統一員每月約薪水銀五百兩數營有分統一員每月約薪水銀五十兩或百兩每營有營官一員每月約薪水銀五十兩較文員俸銀已多數倍而總統每月又另有辦公銀約千兩以爲辦公費稿心紅紙張油燭柴炭等費文案委員等薪水在外分統營官每月亦另有公費銀百五十兩或二百兩以爲添換旗幟軍裝號衣辦公等費夫所謂辦公者從前攻戰之軍奮勇者有獎賞之費受傷者有養傷之費陣亡者有埋葬搬柩優卹之費或遇敗仗有趕辦軍裝之費若防軍

除應酬以塞人言餘則請餉報銷略有領解部費因操糗縱偶有之一營不過數人況糗未必重此外心紅紙札動用甚少油燭柴炭則月有薪水至於各營旗幟軍裝未必月月添置號衣號褂雖一年半時有添換不苛扣勇餉足矣凡此公費所需幾何仍有一年止發勇丁餉銀九箇月或十箇月或閏月並不發餉此雖非各軍皆然而領解悉係庫平銀散發糧餉薪水各項每銀一兩扣減四分每萬兩扣減四百兩此項平餘亦名爲提出辦公是則各軍皆然似此則辦公等費有盈無絀安用薪水之外每月又另加公費然不准支銷則藉口辦公無資按月支銷又未免貪冒殊深竊以爲每年照給公費兩箇月無有不敷此可裁減者二也三曰帳棚折價前敵行軍不得不攜帶帳棚以免野處露宿且轉戰無定易於損失蓋諸風雨嚴霜烈日之中尤易朽敗其不能不半年一換周年一換者勢也若駐守防軍必修築營房以圖永久安居計工估價必作正款加倍報銷而所有帳棚束之高閣悉歸無用又何至半年一換或八箇月一換或一年一換每營每年所添換帳棚價銀至六七百兩之多此不過徒多浮冒欺目耳卽或偶有移調舊者尙存可以適用縱有破壞彌縫補苴足蔽風雨愛惜存儲斷可二年一換此可裁減者三也四曰勇餉減成各軍正勇口糧每名每月給銀四兩二錢親兵什長巡查每名每月給四兩五錢八錢至五六兩不等卽以每名月餉四兩二錢而論較之綠營制兵名糧約多一倍較之旗兵口分則亦多況以

次遞加乎然口糧雖重勇丁果實患均需亦足以示體卹今軍營通弊多端除層層剝削外其每名月餉四兩二錢者每月實獲究亦不過三兩有零其或有時不及此數以旗綠營制兵口糧較之卽照每月三兩有零似猶較重若總統以下各官無復剝削勇丁每名月餉四兩二錢者減爲三兩二錢亦不至形苦累四兩五錢以上者減爲三兩五錢亦足以示優異此可裁減者四也以上可裁減者四項約計每年馬隊一營可節餉銀九千餘兩步隊五百人一營者可節餉銀一萬五六千餘兩短少勇額虛冒名糧猶其小焉者也但遇有事拔營前敵擬裁四項應請酌量加增今無事時核減在久佩兵符聚富已極之總統分統營官原無損於心志獨每棚勇丁之火夫長夫除山總統以下各官分提月餉外或有由各勇丁公同請領火夫應有名糧亦經裁革而餉又核減若復照常層層剝削則勇何以堪所宜嚴禁者又有四端一曰苛扣米價各營軍米原難必駐紮之地隨時可以取資卽有商販存儲售賣價值必昂且恐時有缺乏貽誤軍食其不能不由總統委員於產米之區設立糧臺採買解營接濟者必然之勢也南方地多產米雖有上年中年下年之歲而無年絕少卽遇價貴之時每米一石重約一百五十斤價銀在二兩以上者十年之內無一二年大約上年每石價銀不及一兩中年每石價銀在一兩左右自南方買米以濟南方之軍每石另加口袋船力等費約銀二錢有零若由輪船運至大津山海關一帶每石另加口袋船

力等費約銀六七錢綜核米價並各項運費合上年中年酌盈劑虛約計每石需銀一兩五六七錢實亦不及二兩若發給勇丁無分米價實賤概扣餉銀三兩抵糙米一石約一百三四十斤雖各軍不必事同一律而卽此以概其餘凡有扣米銀之軍則苛派之昭彰者也東西北方小米麥麵價銀多寡未能懸定總宜以採辦之處時值銀數爲斷另加運費爲准核實發給勇丁庶免怨望今不論糧價低昂統以每名每月坐扣米糧銀七錢亦有扣八錢者雖偶有糧貴年分時價過於坐扣之數卽以此類推藉口糧臺賒賠而十年之中或九年價賤扣銀仍不稍減此宜嚴禁者一也二曰勒受衣物勇丁雖患衣食所資領有月餉不難自備每有統領營官製就棉衣及鉤蓋包頭裹腳等件散給勇丁若以爲賞賜則誠善矣乃坐扣月餉較之勇丁自製約實一倍號衣號褂統領營官均有公費本屬應辦之件往往添新換舊悉令勇丁自製其或勇有開除其新充補者接領號衣尙須出錢與統領營官並須出錢與開除之勇方得充補又統領營哨各官及營務處時有親戚家屬故舊攜帶茶烟包頭裹腳布疋等類到營散發勇丁利市三倍不受則竊以威且餉銀業經坐扣勇丁口糧幾何既爲該營官掎克又以之曲徇人情忍恨吞聲吳可如何此宜嚴禁者二也三曰攤派欠餉軍營事件有公而亦有私其應辦公事如修築營房勢必估工加倍報銷卽不報銷勇丁効版築之勞分所宜也一切材料並騾馬統領各官原有公費何以攤派勇丁至

於私事統領以下各官或有慶弔局派公分或有虧短亦攤助公資則又何也柴草一項本爲軍需例載所無近以北方西陲不易取辦特恩加給柴草銀兩體卹勇丁各軍核實發給勇丁者或亦有之克減者亦非全無軍務繁興之時餉需甚鉅庫欸支絀間有短欠亦所難免近則由部撥者無不實發改歸各省籌餉協辦者間或難符定章不能如數領解而總統以下各官卽以協餉短解爲名因而積欠勇餉雖有協餉到營除總統以下各官先扣足虛冒之名種有餘然後酌量散放勇丁待領欠餉無期惟有銜恨或棄此他適因而填滿弊累不軌者往往有之統兵者既有虛冒名糧之實反貽國家欠餉之名轉而索欠餉於朝廷貧鄙欺飾莫此爲甚此宜嚴禁者三也四曰刑誅過當故犯軍法勇丁固有難逃之罪誤犯軍法將帥應有可原之情乃有法非故犯亦非誤犯以幣項養育之勇爲將帥自營其私而勇丁無所需潤既苦鞭策過嚴又苦剋剝太甚欲留不願欲歸不得度日無計度歲無資怨氣所結謗讟交作乃或殺數人以示威或至殺數百人以絕禍貲暴殘刻耳不忍聞此宜嚴禁者四也以上宜嚴禁者四端有各軍通弊者有此軍所有彼軍所無者有採訪尙未得其詳者總之有以卹士卒之苦乃可以制裁滅虛冒之宜也至於整頓營伍核實名糧以求善後應變通者則又有四事一曰隨時換防各軍初募練勇成軍實數尙有八九成蓋應敵之師短少尙不敢過甚一經駐防無事總統分統營官往往飭令勇丁幾成

告假上行下效互相徇囑而在防之勇丁或因病故或因剋苦離營或因事故回籍或因烟賭及犯營規革退而勇額之虛懸已不少矣又總統分統營哨官及營務處各調劑其親戚故舊家人婦女捏開虛名散隸各哨各棚隨時坐扣實餉以及幕友隨員文案之跟隨亦虛補名糧營哨各官瞻徇情面習爲故常如是則名糧之虛冒更不少矣名冊報部則歷歷可稽按之實在則滿七八成者固多極至不滿四五成者亦難保必無雖各軍皆有稽查截曠而勇丁之多寡惟總統以下各官知之虛冒之名糧亦惟總統以下諸人分扣之各營之勇又非他人所能點名清查虛實固不可知強弱亦不可知此駐防愈久不堪深究離京愈遠更不堪深究虛糜帑項所以日甚一日也於萬難祛弊之中惟有隨時更調或調東省之軍換防南省或換西省之營調防北省不可彼此兩省對調尤不可彼此一軍對調除現在劉錦棠一軍尙須防剿餘孽吳大澂所部各營方有應辦事宜傳聞尙爲得力均未便遽易生手餘則無論何軍應令速卽更調不准督撫統兵大臣以久駐防軍熟悉地方情形深資得力及有經手未完事件未能遽令換防等語捏詞搪塞展緩以遂其欺飾彌縫之計況無事之日無事之地久駐之軍得力豈換防之軍不得力果不得力正可裁撤如可効力正資練習其佈爲不可換者非欲擁兵自衛卽恐利權旁奪否則空額太甚恐形跡破露耳更不可不卽令換防至拔營之先應由督撫臣嚴飭各地方官毋許百姓臨時應募充

當長夫開行之後亦不准遊民沿路應募充當勇丁總以該軍實有勇丁自行搬運帳棚輜重起行由該管營哨官嚴加約束到防而換防之期限不必預定年分乃可隨時更調使之倉猝募補不及換防之遠近約在千里以外庶得按站稽查督撫臣預令各該州縣凡遇換防軍營經過地方沿途要隘詳密查點人數稟呈督撫臣奏報即據勇丁多寡以定統兵諸臣之功罪並請 旨破除常格准經過各州縣官核實造冊由驛呈報戶兵兩部使小臣亦得効忠此兼聽並觀之道免致督撫臣獨任其怨歸於瞻徇造報不實如是則防軍之虛實雖逃千里共見共聞之耳目或不致故轍復蹈此應變通者一也二曰疆臣點校各軍練勇由各軍之總統官點名散餉閱操則少者無不以爲多虛者無不以爲實弱者無不以爲強究之多寡虛實強弱 朝廷固不得而知即駐紮該處之督撫臣亦不得而知惟請 飭下各督撫臣於防軍過境之時近則調省遠則出巡駐紮防軍必由之路無論何軍練勇調冊點名閱操則道路之中數之少者不能報爲多額之虛者不能捏爲實勇之弱者亦不能飾爲強即或臨時募補技藝必不嫻熟則老弱者可以沙汰冒充者可以斥退隨時據實馳報 朝廷卽就其現有之勇以爲額以後惟有裁減不准募添庶籌餉又有把握及至到防之後督撫臣一年之內或調省或出巡點名閱操四次則將領之能否勇丁之強弱人數餉數之虛實舉可周知亦令隨時馳報而保獎參劾卽存乎其中則營伍逐漸歸於



整頓督撫臣果能破除情面核其名實雖非其軍統帥亦必有所嚴憚不敢弊端百出此應變通者二也  
三曰餉歸部撥各軍夫價公費帳棚勇餉均已裁減之後弊端悉除勇數又復核實則餉項從新另有定  
數似宜仍復舊章軍餉本向由部撥自咸同年間軍務方殷因由外省籌餉協濟即由外省解赴各軍免  
解部庫發領轉折耽延必多事時極宜辦理也今已晏然無事若仍由各省解赴指定各軍協濟雖曰簡  
便第恐相沿日久視為固然將不復知有朝廷矣在今日統兵諸臣無非勦舊親任原可不疑然日引  
月長老成凋謝倘委任或非其人則兵餉皆在將帥掌握之中事何可言即令萬無可慮而外重內輕流  
弊尤恐滋甚就如本年孝貞顯皇后陵工大差淮綱利銀直隸租銀理應提前報解以應一切要需  
乃各督撫統兵大臣每年開支動逾數百千萬兩朝廷不曾限制而此急應趕解經費數萬兩非請  
飭催幾於貽誤鉅典可見玩視朝廷已成外省積習若不及早裁革虛冒示以限制提充庫款恐將  
來尾大不掉朝廷遇有急需必至呼應不靈也應請飭下部疆臣及統兵諸臣此後防軍月餉除奉  
省現議新章此外各軍月餉現由部撥者仍由部撥由各省協濟者該軍距京在二千里以外所有各省  
協濟該軍餉銀悉令解部由該軍赴部請領其有防軍距京在二千里以外前由各省協濟其協濟省分  
距京較近距該軍較遠者所有協餉悉令解部亦由該軍赴部請領惟協濟省分距京較遠距該軍較近

者所有協餉雖暫免解部應由該軍督辦先期奏請俟奉 旨允准飭部咨行協濟省分方得請領但戶部均應毋稍稽延以免軍心缺望或至飢潰第如此辦理非不知多一往返之勞運解之費惟必如是朝權乃不下移且可隨時循名核實不至如從前公款餉項皆在督撫統兵諸臣之手聽其任意冒濫支銷而各軍的款有著亦不至觀望徘徊誠爲兩得此應變通者三也四曰汰兵補勇歷觀前代開創之初無非兵精而少及至季世莫不兵弱而多 國家創設旗綠制兵六十餘萬近三十年來行兵者皆以爲不可用於是廣招練勇以成軍似練勇可用矣不知前招之練勇養至於今壯而老精力消耗且戍守安閒強者必去弱者方留又安必其皆可用乎既謂制兵不可用則當時裁革補以可用之練勇何至今日仍兩項兼支坐耗糧餉今各省制兵至十餘年不能造冊部其兵政之廢弛可知矣各省防軍至數百營無從核實則餉項之撥卽何望矣卽令裁減虛冒禁革弊端又復如前三者變通核實不過補救目前究之制兵之餉固不能少防軍之餉仍不能無捐輸雖停抽釐如故民困未舒 國帑未裕又將何以計久長乎本年欽奉 明諭飭令各省防軍嚴行稽核汰弱留強 聖諭煌煌至深且遠各督撫統兵大臣高爵厚祿受 恩深重應具有大良閱數月間有一軍一營實力奉行核減浮銷據實馳陳稍盡臣心上慰 宸廑者乎不過視爲具文粉飾因循已耳竊以爲非 聖明果斷特飭各督撫統兵大臣定限

五年將各省綠營制兵水陸防軍分年沙汰各在五年以內隨時裁撤挑補五年以上俱足制兵之額其有限滿制兵練勇尚未開除選補足額節制延宕者無非欲虛報空額吞蝕口糧則其罔利營私富有應得之罪卽有應須設防或疑不敷分布可仿照前貴州巡撫臣岑毓英改定黔省抽兵補練章程應設防軍處所卽撥補充制兵之練勇分起驅策仍以前帶練勇之營官及黔省候補歸標之武員管帶而總其成於撫臣所有統領營哨官委員文案書識等月支薪水比之各軍無不核減兵勇月餉亦不及各軍之半應請飭部調查各省制兵練勇營制名糧冊逐一比較按照黔省章程酌加口糧辦理又黔軍兵勇短少一名記營官大過一次短少二名斥革短少三名以軍法從事雖未必弊絕風清然究不致如各軍虛冒名糧之甚現已行之數年尙無大弊今若兵勇互爲裁汰合二者適符制兵額數則駐防東南之勇卽以補東南空額之兵其有東南之勇從西北等省駐防之軍或有不願歸西北等省之標者則西北等省所裁制兵空額可補其有不足留缺毋溢其留防西北未盡歸標之勇足補西北等省所空制兵之額卽以之留防西北以代空額之制兵可也或留防之勇多於西北制兵空額則以餘勇之名補於東南兵額不足之省而以後糧餉可仍照各省向章開支如是則勇盡勦兵額無空懸則不虛糜費後可以經久此應變通者四也以上可裁減者四項宜嚴禁者四端應變通者四事微臣愚昧之見不知有當萬一否

倘蒙 聖明採擇 特旨飭下部疆臣統兵諸臣立見施行如實事求是毋稍囿近則一年之中可節餉需數百萬兩遠則五年之外歲節餉千餘萬兩則庫藏安有不充而以蘇民困則衣食所資贍金可減以養官廉則京員祿俸可增以卹兵丁則八旗口糧可加殊於 國家至計大有裨益其有公忠體 國者必遵 旨實力奉行具有假公濟私者必違 旨矯語難行 朝廷於此可辨忠奸以行彰瘅黜陟之權矣微臣尤伏念 皇太后 皇上爲國爲民無在不 躬行節儉爲天下先幾於無復可節無復可儉而臣工猶時以節省儉爲言獨至統兵諸臣久處利權不當仰體 朝廷庫款支絀民生困苦求撙節以紓 宵旰之憂乎 上諭都察院代奏教習王開運敬抒管見一摺著該部議奏○丙戌賞烏魯木齊都統恭鐸頭品頂戴○命順天府尹周家枏仍在總理各國事務衙門行走○丁亥諭翰林院侍講學士周德潤奏雲南短解京餉請飭催解並將礦務鹽政妥議章程等語著戶部議奏○戊子李鴻章奏擬州開平礦局招集商賈試採煤鐵曾經 聖 旨摺奏明並派津海關道暨招商局道員唐廷樞會同經理在案茲查該局參用西法開辦數年煤產甚旺目前籌布海防機器製造各局及購到快礮蚊子等船需用煤鐵甚鉅煤礦既辦有成效附近鐵礦擬一併開採以資利用飭唐廷樞親赴遷安縣屬清涼山灤州屬之馬子溝陳家嶺風山一帶勘驗均有鐵苗形質甚佳業已起得百墩寄往英國試練如果合用來春卽

逐漸開採惟該局煤鐵兼管工程較大必須有駐局大員督率經理津海關道政務較繁唐廷樞又有承辦輪船招商事件均未能常川駐局查有廣西候補知府吳熾昌老成幹練樸實精詳通曉西國語言文字於礦務商務尤爲熟悉相應請旨飭下廣西撫臣飭令該員吳熾昌迅速來直由臣酌委會辦開小礦局以資得力 上諭李鴻章奏請調員差委等語廣西候補知府吳熾昌著慶裕飭令該員迅赴直隸交李鴻章差遣委用○諭李鴻章奏永平府知府李秉衡前於冀州任內疏防劫案四番限滿吏部議以降一級調用該員未到新任輒將其前任加級改爲紀錄聲明缺與例章未符等語著吏部明白回奏○諭李鴻章奏紳士勸捐助賑據實奏開等語直隸山西河南等省前值旱荒經謝家福等倡集鉅資分往賑濟屬好義急公江蘇生員謝家福著賞加國子監學正銜廩生嚴作霖著賞加國子監助教銜以示獎勵○著慶等奏寬夏滿營請修城垣衙署兵房俾撥銀三萬兩不敷甚鉅勢難兼顧擬先儘兵房衙署酌量修建報開並著著照楊昌溶於城工一項派員勘估籌議興修○是月津滬電線成設電報總局於天津臨清濟甯清江鎮江蘇州上海等處各設分局○是月俄羅斯國使臣布策回任

光緒四十五

臣朱壽朋敬編

臣潘鴻鼎恭校

十一月己丑朔頒給四川富順縣自流井神廟匾額○丁寶楨奏川省額徵丁糧課稅向不敷年例供支尙賴湖南等省協濟軍興後鄰省協款早停而川省協鄰之款年多一年各前督撫等不得已分年奏辦捐輸一次藉以勻濟京協各餉並非專供川省度支屢奉 諭旨允准在案臣上年奏請接辦捐輸接准部咨川省捐輸與他省設立捐局者不同歷年捐輸向無影射取巧等弊他省不得援以爲例等因奉旨依議欽此欽遵行司遵辦在案茲據藩司鹿傳霖會同捐輸總局司道詳稱近因楚省宜漢兩關子口稅單盛行預徵川省上下水貨物半稅川中卽免收釐稅各關局縱竭力整頓稅釐仍大形減色其津貼一項分供京外各餉撥解早罄所有年撥西征新餉新辦各軍准軍月餉以及黔滇協餉及善後等費暨本省防邊防夷勇餉軍需通盤合計以歲入之數比歲出之數不敷甚鉅上年添撥烏魯木齊軍餉青海王公俸銀本年仍添撥防費各款爲數不下數十萬兩現在藩鹽兩庫搜括已空比上年尤形竭蹶核計年內未解各省營協餉數尙不少來年各處協餉虛懸無著再四籌維會就地辦捐而外別無長策若不

先行籌畫尤恐臨時貽誤關係非輕查川省民多好義糧額較他省爲輕各糧戶歷年報捐助餉無不踴躍本年全川出穀豐登體察民情尙可遵辦應請援照歷年奏准成案再辦光緒八年通省捐輸一次藉資周轉仍循舊章分飭各縣勸諭殷實糧戶按照糧數量力輸將不稍抑勒如中等之戶所捐銀兩不敷議敘封典者准其一體報効彙計銀數加廣學額其零星小戶及邊瘠州縣一律免捐如有收成稍歉之區亦酌情形分別核減以示體卹總期於餉有濟於民無擾等情請奏前來臣思川省自車興以來頻年辦捐久勞民力如各省撥款及各軍營協餉稍可減撥何忍於額賦之外再累閭閻無如各省軍營按年指撥新餉不惟不能酌減惟有逐處加增且復兼索舊餉催提絡繹愈撥愈多又值此整飭海防邊防之時未便停車缺餉致誤大局所幸川省額賦較輕本年年穀豐收糧戶樂於報効併加廣學額與他省從前捐案減成折票專請獎敘迥不相同詳察輿情尙可援案暫辦光緒八年捐輸一次合無仰懇天恩仍准照辦臣督飭藩司嚴禁各屬巧立名目及額外浮收等弊如查有不肖州縣藉端苛派立即嚴參重辦以昭儆戒俾軍實民生可期兼顧得旨允行○庚寅冬至大祀天於闕丘○諭刑部奏職員逃匿請旨革拿一摺廣東候補鹽大使黃文瀚與已革工部主事黃河清通同舞弊盜賣捐案移獎於事經發覺以後請假離省顯係聞風逃匿黃文瀚著即革職著順天府府尹兩江兩廣各總督江蘇

廣東各巡撫飭屬一體嚴拿務獲送部歸案訊辦○辛卯諭吏部奏遵旨明白回奏一摺直隸永平府知府李秉衡前在冀州任內疏防劫案四案具滿照例降一級調用其冀州任內加級於簡放知府後改爲紀錄該部係屬照章辦理李秉衡著仍遵前有送部引見○壬辰予故正紅旗漢軍副都統璟德祭葬○予湖北興國等州縣殉難士民婦女秦厚太等二百二十九名口旌卹○奕訢等奏本年五月二十一日臣等欽奉 懿旨會同左宗棠及直隸總督李鴻章兼管順天府府尹董華等辦理河工水利事務所有直隸歷年修治諸河情形暨左宗棠所部挑潞涿州河道並分辦永定河上下游各事宜均經李鴻章左宗棠隨時陳明在案伏查下游工作已由道員王詩正協同直隸兵勇挑潞截事繼此防護得宜可免倒灌泛溢之患上游係截水於田利害兼顧其工作尤爲喫重臣奕訢於察看神機營水碓造藥局之便於上月二十日帶同全盛翼長副都統容貴文案總長員外郎樺枝遂察所有築壩分渠等工與左宗棠原奏均屬相符河邊間有認種之民闢成田地以待培壅者並細加採訪該處居民歛稱王德榜取軍有法兵民相安其火藥礮石皆擇荒僻之區於百姓田廬墳墓絕無窒礙臣奕訢親見其礮取數石舉手之頃數日運之不盡大石築壩碎石燒灰既省椎鑿之勞復免挽運之費其功效實不止事半功倍已而飭該布政使以下各段工作務照此認真詳慎以竟全工並提神機營存款一千兩由臣等札飭王德榜分獎



勇丁夫役第查直隸全省之大河道之多防患興利之處原不止永定一水左宗棠籌畫極詳惟艱於經費不能大舉而每年補偏救敝之勞已屬不遺餘力除左宗棠所部工作已由該大學士奏明移交李鴻章等分別察驗外相應恭請 懿旨飭下李鴻章順天府尹將已成工作務隨時修治勿令久而頽廢認種之民倘有爭訟務妥爲化導持平辦理小民不致顧忌裹足則已闢之田不致廢爲曠土此外應治之河何處爲先可興之利何處試辦應由該大學士等隨時查明次第奏請舉辦以仰副 皇太后軫念民瘼之至意奏入欽奉 慈禧端佑康頤昭豫莊誠皇太后懿旨恭親王奕訢醇親王奕譞奏查勘永定河工作情形一摺直隸永定河下游工程業經左宗棠督飭所部按照分派地段挑濬蒞事其上游一帶現已將築壩分渠等工逐段次第興辦地方相安河務可期就緒此次已成工作著直隸總督順天府尹隨時認真修治裨益農田毋任日久頽廢此外應行修濬處所並著李鴻章等查勘奏明辦理以興水利而裕民生○陳寶琛奏近日邸抄有楊昌濬建立旂善專祠之請得 旨允准並伏讀之下感憤填胸當日 宣宗成皇帝諭旨斥其辜恩誤國喪盡天良特念世臣未加顯戮至今天下議論者言及旂善二字雖孺子小夫莫不疾首痛心同聲唾罵日之爲禍國之罪魁公論若是正孟子所謂孝子慈孫百世不能改者也卽使旂善別有功德於民亦不能以經理一隅之微勞贖其貽誤國家之大咎況其總督

陝甘也辦理雍沙番族率將無罪熟番濫行屠戮逼供飾奏我 文宗顯皇帝赫然震怒褫職逮問特降  
嚴諭責其謬妄擬殺道戍吉林是琦善在甘無功有罪煌煌 聖訓鐵案如山使琦善死而有知尙何  
面目欲是邪之祖豈乎 備員史館得聞琦善之傳奉使隴坂微聞父老之言琦善於甘肅無一善政可  
書甘肅於琦善亦絕無去思之慕專祠之請胡爲乎來哉且琦善果能造福於甘民初死之時豈無身被  
其澤者爲之請卹何以遲之又久而亂後殘黎怨念及數十年前之總督而欲報以馨香此不過因伊子  
恭鐸現官烏魯木齊都統耳禮部例載子孫官九卿其祖父不得題請入祀名宦鄉賢祠所以杜徇情市  
恩之漸也況專祠之建尤爲 國典之大者乎究之琦善負罪之鉅其不宜祠祀尙不必以例爲衡蓋他  
人之罪祇在一時一事之利害琦善之罪則關天下國家之安危倘令終如所請既無以服天下之人心  
且恐招外邦之譏議其所繫者匪淺也拾遺左右刑賞之大理合盡言敬懇 皇太后 皇上收回成命  
嚴加申飭以重祀典而勵臣忠 上諭前據楊昌濬奏原任陝甘總督琦善蒞任三載整頓地方甘肅士  
民至今感其威惠謹據紳士公呈請在甘肅省城建立專祠以順輿情當經俯允所請茲據翰林院侍講  
學士陳寶琛奏琦善貽誤國事厥咎甚重其爲陝甘總督辦理雍沙番族率將無罪熟番濫行屠戮逼供  
飾奏 文宗顯皇帝責其謬妄革職道戍是琦善在甘有罪無功不宜祠祀請收回成命等語所奏實屬

允當所有琦督建立專祠之處著卽撤銷楊昌濬據紳士呈請率行具奏著傳旨嚴行申飭○癸巳丁寶楨奏川省候補人員極形擁滯請暫停分發兩年下部議奏○丁寶楨奏四川一省幅員遼闊異常東南則接壤滇黔西北則毗連藏衛秦隴雖軍務早經平定而內地尙多伏莽邊境時警夷氛自光緒三年三月蒞川正值馬邊夷匪出巢滋擾並有大全州王萬春卽王峻峻等頻年倡亂抗敵官兵日久稽誅至冬間又有羅江縣匪徒黃麻二等糾眾撲城戕弁幾至蔓延不可收拾均經督飭勇營將弁勇丁次第剿平殲除首逆地方漸覺安靖去年義邊雷波兩屬夷匪復勾串涼山野夷分股接連肆擾勢甚囂張又恃其地險巢堅剿辦殊不容易而夷塘之查禁野番又勾結瞻對番兵刦殺土民圍攻官寨壘垣均經調派各防營將領協同地方官督率員弁兵勇紳團將羅江首匪及義雷各匪堅巢平燬殆盡首逆匪擒斬撲滅淨絕根株其餘附和夷匪則痛加懲創剿辦兼施次第投誠迭次奏奉 諭旨准其擇尤保獎毋許冒濫各等因欽此謹卽恭錄宣布 恩綸曉諭各營一體欽遵該弁勇兵團等無不踴躍歡欣益思奮勉嗣據各將領稟保前來伏查該員弁等出師於蠻烟瘴雨之中奏凱於酷暑嚴寒之際或奪險攻堅蕩平碉寨或殲除首逆力挫凶鋒紳團等或採運米糧濟資軍食或集團隨剿共保綏疆均屬艱苦備嘗不無微勞足錄惟歷年既久人數較多節經 臣與恆訓暨現署成都將軍 臣托克湍和衷商榷從嚴核減謹

分案繕具清單恭呈 御覽竊懇 恩施立沛以作士氣而勵戎行得 旨魏芹芳著賞給壯勇巴圖魯名號韓育才著賞給振勇巴圖魯名號羅志珂著賞給克勇巴圖魯名號姚山剛著賞給捷勇巴圖魯名號餘均照所請獎勵○甲午以燧桂爲體仁閣大學士○諭巡視中城給事中安祥等奏遵保糧盜出力紳士並請將前保紳士胡以霖改獎各摺片著該部議奏○諭巡視中城給事中安祥等奏遵保水會紳董開單請獎並請將衛守備張映甲改獎各摺片著該部議奏○丙申諭溥廩等奏防禦咆哮公堂請嚴加議處並請將總管翼長分別議處一摺防禦春齡因揀選翼長總管椿齡並不排列等次輒行具稟呈控旋復咆哮公堂自請參辦實屬行同無賴有玷官方春齡著交部嚴加議處以示懲儆總管椿齡翼長春霖於應行揀選官缺因值恭備要差遲逾日期尙屬有因惟各員內有應行斟酌之處並不預爲回明追驗看後又不排列等次辦理拘執亦屬不合均著交部分別議處○李鴻章奏准刑部咨開御史胡隆洵奏請將盜案仍照舊例分別首從辦理一摺部議欲復情有可原舊例莫若將就地正法章程先行停止應由各省體察地方情形妥議具奏等因奉 旨依議欽此當經督飭臬司葉伯英體察妥議茲據詳覆前來臣查直隸近年拏獲盜犯如係尋常搶劫人數無多並無殺人放火等項情節悉照定例解勘分別題咨聽候部覆辦理其迫於饑寒被人誘脅情有可原者或量予減用廣 皇仁而重民命惟情重

之馬賊海盜匪游勇不得不嚴速懲辦以遏亂萌誠以此等匪徒目無法紀橫悍性成習慣爲盜動輒  
嘯聚多人橫行村市倚強肆掠或騎馬持械中途截搶或駕船出海迭劫巨賊甚至炮烙事主強姦婦女  
燒燬房屋拒傷捕人劫掠官衙餉鞘凡此種種兇惡實屬罪不容誅若復轉輾遷延久稽顧戮不特解審  
在途羈禁在獄慮滋事變而被害商民祇見其犯法不見其伏誅殊不足以平怨憤而儆効尤且就地正  
法之犯必令該地方官詳細研究錄取切實賊認明確再由臣飭派本管道府或另委委員確加覆審果  
是情真罪當方始處決絕無寬濫之虞直隸幅輿遼闊西北臨邊東路濱海時有馬賊海盜勾結爲患塞  
外之張獨多三廳廣袤千數百里匪徒橫行肆無忌憚西南路之深冀正趙順廣大名一帶與東豫犬牙  
交錯素爲烏盜出沒之區迭經派撥練軍分投巡緝拿辦伏莽尙多盜風實未盡靖息夫重懲強暴正所  
以保全良民培養元氣況畿輔重地尤宜防患未然原定就地正法章程一時礙難停止約計直屬盜案  
照例題咨者居其大半僅就情重者酌量嚴辦本屬並行不悖應請仍循歷年奏案尋常搶劫盜犯照例  
解勘分別題咨其情重之馬賊海盜烏匪游勇審明就地懲辦以示區別而綏地方下刑部知之○丁酉  
上諭 大高殿祈雪○諭李瀚章等奏拿獲滋事會匪就地懲辦等語湖北施南府所屬山羊溪地方  
有匪首楊登蟠膽敢糾集不法之徒結會拜盟迭次遣黨劫掠燒殺擾害閭閻並與四川等省匪徒潛謀

滋事實屬罪大惡極現經李瀚章彭祖賢飭屬擒獲將該匪首就地正法解散脅從並將山羊溪匪巢平毀仍著該督撫隨時飭屬查拿匪黨並著四川湖南貴州各督撫飭令毗連各屬一體嚴拿逸犯務獲究辦以靖地方此次出力之把總關發旺著以千總儘先拔補勇目龔應春著以外委補用○諭兵部奏各省棚馬驛站奏銷久逾例限開單請旨飭催一摺各省棚馬驛站奏銷竟有積壓數年至數十年之多前經該部於同治七年光緒三年兩次奏催迄今仍未題報實屬延延即著各該省自光緒七年起將棚馬驛站奏銷詳細造冊依限題報如再遲延即由該部嚴參以儆玩愒其歷年欠報各案並著各該督撫造具簡明總冊分年帶補併案題銷至積案多寡不同各省情形亦異應如何題銷之處並著該督撫奏明辦理○戊戌諭劉坤一奏革員訊供刁狡請旨刑審並將原審各員分別解任調省查辦一摺已革參將胡金傳承緝江甯省城三牌樓地方命盜妄拿教供刑逼定案業將曲學如僧紹宗處決現經劉坤一另獲兇犯周五沈鮑洪供認謀殺朱彪不諱並訊出從前胡金傳嚇賄眼線教串各節衆供確鑿可據該革員猶敢架詞曉辯堅不吐實殊屬刁狡即著劉坤一嚴行刑訊務令水落石出以成信讞所有此案之原審官兩准鹽運使洪汝奎淮安府知府孫雲錦均著解任並分別撤調署沐陽縣知縣嚴堃署清河縣知縣丁仁澤候補同知單之珩到省聽候查辦○記名提督直隸大名鎮總兵徐道奎等奏道光二十三年

奉准直隸東督撫臣行咨會奏酌議直隸河南山東三省會哨章程一摺經兵部議奏奉 旨依議欽此  
欽遵在案查自同治九年三省仍舊會哨因黃河改道擇在直隸開州城內爲三省適中之地嗣因曹郡  
至開黃河中阻天寒冰結兵馬難渡於同治十一年咨稟督撫臣改期於十月內舉行歷經遵照在案茲  
以時交冬令當屆會哨之期曹州鎮總兵王正起仍在海防奴才等理應遵照上年章程約定日期各帶  
官兵皆由本境分路行走俱在三省接壤之處過厯稽查妥爲彈壓以期靜謐奴才等均於十月十六日  
齊集直隸開州城內晤面會哨伏查直隸東三省壤地毗連犬牙相錯素爲盜賊出沒之區必須三省聯  
爲一氣嚴加巡防庶免無虞奴才等惟有悉心會商和衷共濟督飭所屬營汛各員弁按期會哨時常派  
幹練弁兵無分畛域不動聲色改裝易服明查暗訪若探有匪蹤無論在何省地面就近會同營縣帶領  
兵役合力捕拿斷不敢意存此疆彼界之分總期首犯必獲不致連颺爲害地方務要三省聯爲一氣使  
宵小斂跡以仰副 聖主除莠安良之至意報聞○己亥以貴恆爲內閣學士○諭工部奏修理陵工請  
照向章辦理等語向來 東陵 西陵遇有異常緊要工程原准隨時奏報專案辦理近來該管大臣於  
奏報歲修另案工程時復派入專案急修等工殊與向章未符嗣後該管大臣如遇異常緊要工程仍舊  
隨時專案奏請估修其餘一概併入另案不得於奏報歲修另案工程時列入專案等取名目以歸劃一

○諭翰林院侍講張楷奏請變通特用道府人員選班並酌定道府同通各缺咨留章程各等語著吏部議奏○李鴻章奏拿獲紅陽教匪徒孫汶沈等審明按例定擬下刑部議奏○馮譽駿奏陝省自兵燹後農商未盡復業每年例貢方物請仍行停止允之○張道淵奏向來各省中文武大員有政績戰功令人感念者但經奏請 恩施無不分別旌獎所以崇實行而勵人心誠 盛典也惟查近年各督撫奏請者多或係前任大員或係共事諸臣往往其人已故數十年在官升降二三次年湮代遠事過境遷一旦舉其措施數端征伐數處列之奏章不嫌溢美又或取長略短掩過飾功揚厲鋪張連篇累牘幾於其人爲古今所未有及考其實大半以假爲真以無作有非受人囑託以了私情卽徇己知交以酬夙願種種情弊不一而足伏思賢臣良將衆口交推頌德歌功當時雖已如果人人欽仰早有爭先恐後出而表彰者何至遲之數十年以後僅得一二人之言若日久無聞忽有人代爲奏請則訪查無從不妨空言捏飾其不足憑也明矣夫督撫奏事向來 允行者多相待從優亦信其秉公持正若如聚培植會爲贊長齡奏請立傳易名今楊昌溶又爲琦善奏請建祠不惟是非顛倒功罪不分直以明知故爲欺罔 君上若再漫無限制竊恐事隔多年鉅典盡成私弊將來數十年後必至妄殺無辜如已革提督成祿已革總兵李有恆輩且有誇張功績捏詞爲之奏請者其何以信今而傳後乎世道人心所關不可不慮應請 明



降諭旨嗣後各省有已故大員政績戰功應請 恩典者該督撫查明事實定限於該員身故後十年內  
准其奏請逾限即不得再奏倘有虛捏欺飾假公報私等弊及已故大員之事業經數十年之久而妄行  
代奏者即將該督撫從重嚴議不貸並請 飭部將定限年分增入條例永遠遵行 上諭給事中張道  
淵奏已故大員請旨加恩應定年限等語近來各省督撫奏請已故大員事實宣付史館建立專祠朝廷  
覽其所陳政績多予允行以順輿情而昭激勸茲據給事中所奏徇私溢美等弊誠難保其必無竹帛蠹  
香皆屬朝廷曠典非可濫邀嗣後各省督撫務當確切訪查必須實政在民允孚公論者方准奏請恩施  
不得稍有虛飾自干咎戾至該給事中所請定限十年逾限不得陳請之處著毋庸議○庚子諭軍機大  
臣等有人奏直隸鄧署文安縣知縣陳紹謀在署任時妄議加增稅銀藉端勒捐因案納賄諱盜為竊各  
等語著李鴻章董誥游百川按照所參各款秉公查明據實參辦○辛丑 上諭 壽皇殿行禮○衛榮  
光奏准刑部咨御史胡降洵奏請將盜案仍照舊例分別首從辦理一摺恭奉 上諭交部議奏旋經部  
議以欲復情有可原舊例莫若將就地正法先行停止請 旨飭下各省督撫將軍都統府尹體察地方  
情形將夥眾持械強劫案件仍照成例解山該管上司覆勘分別 題奏請 旨不得先行正法迅速妥  
議具奏再由部 臣彙核辦理等因奉 旨依議欽此鈔單咨行前來遵查各省自同治九年經前撫臣李

宗義以歸綏道所轄各屬及雁平道所屬近邊各屬州縣幅輳遼闊蒙民雜處向多馬賊土匪首南亦多游勇往來騎馬持械嘯聚成羣無論白晝黑夜邀劫掠肆無忌憚大為地方之害當經奏准嗣後拿獲前項匪徒均援照直隸奏定章程歸於地方官審明稟報山王批飭該管道府州親往覆訊後即行就地正法仍照舊馬強盜之例於行劫處梟首示衆嗣於同治十三年御史鄧慶麟奏軍務肅清省分拿獲盜匪請照舊例辦理旋經部議以各省情形不同令各督撫體察情形具奏復經前撫臣鮑源深以口外地廣人稀盜劫迄未少息陝甘現雖肅清新疆軍務未竣晉省南北游勇乘機夥衆劫掠亦時有現辦就地正法章程仍難遵行改歸舊制奏明俟新疆肅清盜風止息再行改復舊例各在案伏查晉省辦理就地正法章程惟歸綏所轄各屬及雁平道所屬近邊各屬州縣暨省南游勇三項其餘尋常盜劫之案俱遵定例仍由府州縣臬司層次解省審勘即馬賊游勇土匪三項內如其情有可原亦仍歸另案審擬解勘並非一概正法且須地方官審明稟山該管道府州親往確審情真罪當方始照章正法本極斟酌謹慎無虞竊濫現雖軍務肅清新疆猶駐重兵而口外大青山後界連新疆為馬賊游勇出沒之所本年四月口外鐵帽兒村有馬賊多人白晝持械搶掠馬騾拒傷事主蒲縣黑龍關又有戕官奪犯重案而各屬呈報盜劫之案層見迭出雖經王將案情較重各案先後專摺奏參尙未能破獲一案是晉省盜風仍未

能止愚者遽行停止就地正法章程仍由府州審擬解勘不特若輩犷悍性成端與決衆長途押解疏脫劫奪在在堪虞且恐在就地正法餘匪未見顯戮不足以寒賊膽而靖地方臣與司道就督省細心體察就地正法章程遽難停止請俟新疆重兵遣撤盜風止息即將就地正法再行停止庶於地方大有裨益下刑部知之○壬寅允黎培敬開缺調理調衛榮光爲江蘇巡撫以張之洞爲山西巡撫○予載敦病假一月以奕綱署鎮紅旗蒙古都統○癸卯諭已革提督李世宗從前稔惡多端跡其生平罪狀原應立予刑誅迭經法外施仁未加顯戮同治年間在江蘇揚州府滋事欽奉 諭旨交地方官嚴加管束倘別滋事端卽著從嚴治罪該革員如果歛跡守法朝廷務崇寬大亦不追其既往乃據裕祿奏該革員怙惡不悛兇暴恣肆擅提貢生吳廷鑒等誣以行搶橫加毆辱一案凡有見聞同聲切齒是其狼子野心不知感恩畏法種種妄爲若不從嚴懲辦無以肅法紀而儆兇頑現已令裕祿將李世宗正法以昭炯戒該革員罪由自取與其舊部人等全無干涉並著該撫明白宣諭俾衆周知朝廷用法一秉大公至意○甲辰諭本日楊昌溶奏遵保川兵援甘出力員弁一摺前已將前四川川北鎮總兵鶴齡交部照軍營立功後病故例從優議卹單開各員分別照請交議矣鶴齡病故多年楊昌溶未經查明率請給獎殊屬疎忽著交部議處○乙巳予故前任刑部左侍郎黃鉉祭葬○丙午 上詣 大高殿祈雪○己酉諭前據劉坤一

奏江南三牌樓地方一案訊有革員胡金傳妄拿教供隨同問官喝令用刑逼認情事當經降旨將胡金傳嚴行刑訊並將問官洪汝奎等解任查辦茲據御史李郁華奏問官冤殺無辜督臣意存袒護等語究竟胡金傳如何私與問官刑訊其妄拿教供洪汝奎等有無授意情弊著劉坤一秉公研訊確情按律定擬前奏所稱洪汝奎以案情重大稟請另派大員覆訊是否有案可憑著確切查明於定案時據實覆奏毋稍徇隱自干咎戾○諭御史載彩奏營房拆賣太甚請有嚴禁並請飭興修一摺八旗新舊營房關係綦重若如所奏近年不法兵丁多有拆毀典售情事殊屬不成事體著八旗都統會同步軍統領認真稽察嚴定章程實力禁止其傾毀營房並著查明咨部設法興修以昭整肅○庚戌予故原任甘肅甘涼道李鶴章於江蘇無錫金匱縣地方建祠○譚鈞培奏護送朝鮮遭風難民康如宏等赴津由京資遣回國報聞○予浙江蕭山縣孝女郁寶華旌表○馮譽駿等奏陝省士習文風日臻樸茂擬案請增優生貢額下禮部議奏○辛亥諭軍機大臣等有人奏雲貴總督劉長佑吸食鴉片有年蒞任以來泄泄沓沓溺於嗜好轉氣漸深難免貽憂損鍊等語著丁寶楨確切訪查據實具奏毋稍徇隱將此諭令知之尋奏上劉長佑吸食鴉片溺於嗜好各節並無實據置勿議○予故原任直隸提督郭松林附祀天津曾國藩專祠○以欠解江蘇協領銅本銀兩摘雲南候補道張承頤頂戴並飭江蘇巡撫勒限嚴催追繳○壬子岑毓

英奏澎湖前遭颶風被災甚重現查各島饑民共有八萬餘丁口先後運到米糧不敷分散轉由省城增  
廣倉義穀項下借提陳穀二萬石運往接濟得 旨著該地方官妥爲賑濟毋任失所○癸丑允寶器請  
予假一月調理以瑞聯署鑲藍旗滿洲都統○諭前據涂宗瀛奏斬犯胡體安臨刑呼冤一案日久未據  
訊結茲據御史陳啟泰奏風聞承審各員有貪緣新任撫臣意在避重就輕串令該犯誣認爲從如有不  
承擬卽監斃滅口等語人命出入所關至重著李鶴年迅將此案秉公訊結務成信讞毋稍瞻徇○以軍  
機處繕修漢字檔冊獎敘總司校勘刑部卽補主事吳引孫等有差○任道鎔奏前准刑部咨議覆御史  
胡隆洵奏請將盜犯仍復舊例分別首從辦理一摺以欲復情有可原舊例莫若將就地正法章程先行  
停止請 旨飭下各省體察情形妥議具奏等因奉 諭旨依議欽此鈔錄原奏咨行到東當經前任  
撫臣周恆祺欽遵行司核議茲據臬司潘駿文具詳前來臣伏查拿獲盜犯審明就地正法原因當時盜  
風甚熾欲求辦理迅速以遏亂萌不得已權宜變通誠未可視爲成例第獄鞫固貴詳慎而立法尤在因  
時東省爲畿輔屏藩捕務實煩倘關緊要西南之兗沂曹濟各屬多與江豫接壤素稱捻幅淵藪東北之  
武定青州一帶地處海濱亦時有馬賊島匪出沒非隨時就地嚴加懲辦殊不足以戢兇暴而知儆畏咸  
豐十一年間經前撫臣譚廷襄因鹽匪充斥先後奏明拿獲罪應斬島斬決盜犯島匪由地方官訊取確

供詳經撫臣委員覆審明確卽請就地正法按季彙奏仍分案錄取供招咨部核覆同治八年御史袁方城奏請整飭吏治摺內欽奉 上諭業經肅清省分遇有獲案要犯仍照舊章詳由該管上司覆核辦理以重人命欽此復經前直隸督臣曾國藩以直省各匪餘孽尙多奏請直隸拿獲場匪仍照奏定章程辦理奉 旨允准並因山東河南兩省壤地相連情形相近仰蒙 特旨一併照辦嗣於同治十三年因御史鄧慶麟奏肅清省分盜匪請照舊例辦理光緒六年刑部因各省辦理盜匪未能一律行令距省較近州縣獲有前項案犯解省審勘由該督撫分別題奏均經各前撫臣以體察情形礙難規復舊制惟濟南府屬拿獲匪應斬梟決盜犯審明後本就近申解臬司親訊無異再詳由撫臣核明批飭正法其餘各屬請仍照奏定章程辦理先後奏准各在案是東省辦理盜犯變通舊章業已二十餘年歷時不爲不久每年正法匪犯亦多至百數十名而盜風迄未稍息搶劫販私之案仍舊層見迭出臣到任後嚴定功過飭各屬整頓捕務並酌撥防營扼要分布會同有司合力巡緝以期有犯必獲近據各州縣報獲盜匪尙復不少亟須就地懲辦俾奸宄觸目驚心咸知炯戒若一旦責令照例層層解勘不特長途跋涉疏脫堪虞抑且各犯羣聚省監亦恐別滋事端臣與臬司悉心體察再四籌商竊章實驟難停止相應據實請旨俯准東省拿獲盜犯土匪梟梟仍照奏定章程辦理洵於地方捕務有裨一俟盜風稍息卽當奏請

改復舊制倘過犯供未確案情仍略有疑竇隨時提省委審以昭慎重斷不敢稍事顛預致滋枉縱下刑部知之○乙卯諭御史胡隆洵奏大挑知縣補缺遲滯量予疏通一摺著吏部議奏○准將浙江提督黃少春開缺養親○諭烏拉喜崇阿等奏交查吏部一案應否迴避聲明請旨一摺烏拉喜崇阿許庚身徐用儀均著准其迴避○戊午文碩奏恭照 大內門禁亟宜嚴肅前此宿衛官兵怠忽玩泄節經臣工條奏欽奉 飭交御前大臣等會議章程奏蒙 明詔飭下欽遵在案數月以來奴才於到閣察本見 東華門 文華門值宿護軍較從前早朝退值後差為改觀然邇者 東華門牆上額勒登額字又忽不見不知是自脫落抑又遺失如其脫落則到地必有聲響斷無值宿護軍毫無知覺之理且其字亦當有著苟其無著必又失矣夫匾懸重檐之上既高且深當年欲造諒必堅實斷非昏夜倉卒所能挖竊者何竟遺失殊不可解使萌蘖逐漸潛滋其流弊何堪設想竊謂察失立防不容已也謹就管見酌擬八則臚陳如左一大臣值宿察吏向來僅及平地朱車城上則未嘗登涉蓋各門官兵分應兼顧馬道如果認真守體城上自不致有疎虞初無待於巡視也無如此來 功令申飭再三而城上屢經被竊是不可不思變計矣請 飭下 景運門該班護軍統領嗣後除仍嚴飭各門官兵認真兼顧馬道外每月不必拘定准期亦毋庸預傳時刻無分晝夜隨時會同內務府文武大臣分投上城巡視數次每巡必行歷兩門此上

彼下如過夜分燈籠自不可少但須解飭兵丁跟隨不准私攜烟袋等物上城以昭慎重一六班值宿王公領侍衛內大臣例不察更外其餘均應周歷巡視隨處督察現在 景運門護軍統領巡視 內廷宮牆以外文武職大臣巡視 正朔各處朱車第圍牆外多內務府朱車其護軍則屬包衣統領管轄總管內務府大臣節制故其報單僅遞內務府不遞 景運門而八旗朱車報單又僅遞 景運門護軍統領不遞文武職大臣不過每日派護軍二名隨從該大臣等一察而已循名核實難與責成奴才愚以為似宜酌分段落各俾專司庶有實濟擬請嗣後 太和門親軍及 昭德貞度等門以內中一路護軍值宿均交散秩大臣偕同該辦事章京督察巡視凡包衣朱車等交內務府大臣率同包衣護軍統領督察巡視八旗朱車專交 景運門護軍統領率同司鑰長督察巡視至文武職大臣既無本管兵丁則協同稽查是其專責應不分文武每日輪一人分巡包衣朱車一人分巡八旗朱車以輔各該管大臣之不堪用收相助相維之實濟巡察之法應每日閤門後先察一次既而夜分再察每次應由 隆宗門司鑰長撥給文武職大臣護軍校或藍翎長一員護軍各五名以資差委散秩大臣應帶親軍數亦如之各處報單遞本管大臣外應令兼遞稽查大臣以憑察核該大臣等接到報單次日交班時應付侍衛處主事呈明王公內大臣存案扣總管內務府大臣差務煩重員數又少查內務府缺之 泰宸苑等三院卿本任職



司較簡其品秩視郎中較大若照內大臣補班之例令其補進內務府大臣班撥之體制更覺允協可否之處祇候 聖裁一欽惟我 朝家法首崇勤政然往昔視 朝恆以卯刻開門接事在丑正後有時或及寅初近年子正即開門矣是爲當年赴 圓明園遊事德勝門西便門方開時也毋乃太早恐轉非執中之道嗣後可否改循舊制恭候 欽定併請聲明舊例非黎明辨色不准擅出 禁城以重門禁抑東華門 西華門應禁婦女步行出入以肅觀瞻一凡紫禁城內地面皆隸 奉宸苑管理而內閣各部起居注內務府上駟院鑾儀衛內庫各等處則由各該衙門自派官役住宿看守此外又有各部院衙門公立值房爲諸臣待漏退食之所雖非經制衙門然而相沿已久其承應人役有由各衙門另派者亦有交內務府蘇拉照料者情形不一總之在官人役諒不敢輕自犯法第無查點章程則彼此不相稽核空聞處所難免有閒人混跡託足之弊請嗣後凡有專隸衙門處所應仍由各該衙門自派官役住宿看守其無專隸衙門空閒處所應由 奉宸苑酌撥官役看守巡邏仍將所派官役姓名人數報明內務府景運門請給腰牌以便查核遇有更替隨時知照各該官役住宿處所除由值班大臣官兵抽查外並令伊等互相究稽日後倘有閒人混跡託足之事如敢漠視一經發覺除相去甚遠隔牆隔院者免其查究外其相離較近出入見聞理難諉爲不知者容隱之人即使訊無賄賂實徇庇情弊亦應比照外間保甲連

坐例加等治罪其有留心盤詰者不拘遠近均准赴值班大臣前出首首告得實量予獎賞至若阿哥所地更尊崇尤宜慎重現在內無關防雖門鍵森嚴而屋宇既多瞭垣又矮不可不加之意也宜如何派撥官役常川邏守之處請 旨交該衙門妥籌辦理奏明立案嚴飭所司慎勿敷衍塞責一太監他坦附近 宮牆之所規制尤宜嚴肅第若輩給使內廷例不准常出 禁園則置買日用什物以及搬煤汲水等事勢不能不藉資人力又其屋內瑣碎工作需用匠藝亦情事之所不能免者諸如此類應如何稽查約束其藉資人力或應視錫伯甲由內務府撥給辛者庫蘇拉種種章程必有成法總不外乎 欽定宮史及現行則例特外廷臣工未能諳悉既無模範在胸臨事未免徬徨失措因而非過則不及者時或有之請 旨交內務府將有關門禁稽查約束各事宜欽奉 諭旨一切章程逐細摘出恭錄知照 景運門等處值班各大臣以憑一體欽遵惟是例舉大綱其有詳細節目或為例所未及而又實係勢所不能免之事與其勉強遷就姑漫聽之似不若由內務府準情酌理嚴定章程奏准明示實力奉行轉得稽查有所限制一查 大清門內乃 紫微禁近之區 西苑三海為 聖華臨幸之地其門禁應與 大內一體慎重請 旨飭下各該衙門嚴飭所司加意典守勿任廢弛至于各屏三海宜做 御園查驗陳設例每年夏季由該衙門奏請 欽派大臣查驗一次並請紫光閣敬謹扃 武功園蹟功臣像亦慎

重珍藏之一道也抑各部院衙門微員吏役人等徒步趨公往往由紫禁城內往來行走不過意取便捷稍節步履律以定制原屬未協奴才愚以爲因公行走易於辨識揆情度事似尙無大窒礙如果實係微員吏役因公行走可否准其由闕左右門東西長安門往來出入之處出自聖恩至於紫禁城內則非有應進大內公事仍不准擅自行走以示限制一親軍前鋒護軍等營職司宿衛即使巡邏周密守護謹嚴亦其職分當然卽不得爲勞績惟現當積疲之後力挽頽風似不得不略從鼓舞以昭激勸請旨飭下各該管大臣嗣後值班官兵如有遇事果能盡職者卽當量予獎賞甚則拔以升階倘再疏忽別經發覺其失察之咎亦必從嚴懲治其或偶爾疏忽於前旋能緝捕於後所有應得處分籲懇天恩似宜准其抵免俾該官兵無所迴護不致仍前畏首畏尾隱忍瞻徇抑上年午門值班緣事獲譴兵丁其咎固所自取然核其情由尙爲慎重職守起見故得仰邀皇太后皇上特恩寬免餘罪現在事關年餘伊等既知慎重職守則是尙能當差効力之人方諸同儕可謂鋒銳設資終身靡棄未免可惜可否飭交該都統先令挑充馬甲効力如果奮勉遇有護軍缺出仍令儘先充補抑或得令開復護軍遇缺坐補之處出自逾格鴻慈或亦力矯積習策馭羣下之一道也一宿衛官兵愈忽玩愒督責固所難寬而風雪嚴寒勞苦亦殊可念前已蒙恩賞加經費現際隆冬該管大臣自應籌畫添給柴薪其

例在門洞值宿兵丁尤宜給予勅木噴扼要支撐俾資棲止用示體恤 上諭內閣侍讀學士文碩奏門  
禁宜嚴散陳管見八條並請變通大臣進班章程各摺片著御前大臣軍機大臣內務府大臣前鋒統領  
護軍統領會同妥議具奏○以京師久未得雪命於 大高殿開壇祈禱 上親詣拈香○戊午岑毓英  
奏本月初一日復行渡臺籌辦撫番事宜並督修城池礮臺河隄各工程報聞○寶廷奏本年屆 京察  
之期十月間有 旨通諭部院各衙門諄諄 訓誡仰見 聖朝澄敘官方至意然奴才竊以爲諸臣仍  
將視為故事具文也何也積弊已深非空言所能改變也近年風氣日壞一日每屆 京察堂司各官上  
下營營舉國若狂瞻徇情面猶弊之輕者賄賂潛行恐亦未必無之不論才守不論資格並不論例案不  
論文理所保非貴近子弟卽浮華少年但藉當差勤奮一語掩飾耳目其實平日點派差使大半由請託  
而來預爲一等地步並非熟習部務實有勤勞以黜陟幽明之大典作攀援勢利之捷徑舉不能公劾豈  
能嚴浮躁不謹之員所在皆有此輩皆營營求每爲堂官所喜不惟不劾且欲舉之歷屆 京察所保才  
長政勤者半是此類又安望舉劾盡當哉夫守之清濁曖昧不易知也才之真僞倉卒不易見也而資格  
之淺深例案之生熟文理之明昧則易知易見也居今之世內外大臣求才守兼優者能有幾人何況司  
員今之所謂才者不過奔走勸應對捷耳若此者何足爲才且每無守習俗移人人材難得漢司員例案

文理尙不至不諳而節氣操守未必盡能剛正滿司員則例案未必盡明文理或甚至不通守清尙許有人才長殊不易觀方今滿漢司員中求才守俱平者已不能多得又何論兼優乎伏讀嘉慶五年十一月十八日二十年十一月初二日 聖諭咸豐九年十二月十八日十九日 硃諭諄諄戒飭以資格例案文理爲首仰繹 聖訓蓋知積弊已深非旦夕所能挽回任缺勿濫徒託空言有舉無効已成錮習全材難得與其求全責備適至以僞亂真不如核實節取可收得人之效今欲整頓 京察非詳細申明冊章釐定處分責成樞臣認真攷察不可伏乞再降 嚴旨通諭各衙門堂官恪遵歷次 聖訓以爲攷察各備一冊密識實否公議同覽用憑舉劾首取操守兼優之員以備擢用如不可得則取資格較久謹厚樸實之員資格過淺者苟非才猷特出不許藉口差使遽行濫保文理不通例案不明之員不許濫保貌似有才輕浮澆薄之員尤不許濫保如有此等弊端一經察出或被參奏卽謹遵 聖訓照例實降不貸聞近來 京察堂官多不備冊密識應令 京察後將冊封送軍機處備察以觀各堂官聚取之公私偏正皇上尙在冲齡 皇太后垂簾聽政保一等者開印之後雖有引 見可觀其年力 召見可攷其言語而俄頃之間豈能攷察詳細其應劾不効者更無從周知當責成樞臣博採時論秉公攷察乞 飭下樞臣將保列一等司員分月傳至詳加驗看詰問如有不符卽參奏撤銷一等原保堂官謹遵 聖訓照

例實降如此核實舉劾認真攷察庶有忌憚少除積弊不敢視為具文矣然而此猶小焉者也部院司員之京察不可不嚴內外大員之京察豈獨可不公不嚴甄別之權雖 皇太后 皇上操之而實樞臣替之効士不職司員不如効一不職大員奴才竊恐瞻徇情面之弊不專在各部院堂官矣樞臣果能精白乃心破除情面不特能攷察各部院司員之賢否並能攷察內外大臣之賢否若夫不免瞻徇無論不能察出也縱使察出亦不能秉公甄別試問上屆各部院京察果皆公且嚴乎內外大臣京察果皆公且嚴乎各部院瞻徇之弊果皆察出乎所察出者果能嚴辦乎是樞臣先以京察為具文又何責於各部院堂官乎更乞 嚴旨飭樞臣預將內外大臣才守聲名孰優孰劣孰當舉孰當劾孰當照舊供職秉公詳察開單進呈毋得瞻徇庇護應劾不効尤不得徒以衰老無過與官職較小者休致數員塞責如不公不嚴經人糾參惟樞臣是問而攷察樞臣之功過則在 皇太后與 皇上樞臣夙夜在公均有微勞而其中優劣亦頗不同若無所區別概予議敘是 朝廷先以京察為故事具文何以倡率羣下乎是在 聖明獨斷非臣下所敢妄參也 上諭侍郎寶廷奏京察積弊難除責成樞臣攷察一摺京察為攷績大典歷朝 聖訓諄諄誥誡 成憲昭垂本年復申諭各部院衙門秉公攷核至為嚴切該堂官等自當懷遵前旨力除積弊並查照定章於所屬各員悉心甄別各備一冊密誠賢否公同酌定期

於舉劾至當倘仍視爲具文竟有瞻徇情面舉劾不公等弊一經查出定當從嚴懲處至所奏京察後將册封送軍機處以觀各堂官棄取之公私並飭樞臣將保列一等司員分日傳至詳加驗看詰問等語各部院司員等平日才品如何非本衙門堂官不能周知盡悉至軍機大臣預參密勿獻可替否本其職分若各部院京察一等人員於引見召見之外復令該大臣等博採時論攷查驗看無論各堂官去取之公私與各該員居官之賢否未能取決立談之頃且流弊滋多亦屬無此政體所奏著毋庸議○予湖南善化縣孝婦左賀氏旌表

十二月己未朔諭禮部奏元旦令節禮儀請旨遵行一摺朕奉 慈禧端佑康頤昭豫莊誠壽恭欽獻崇熙皇太后懿旨光緒八年元旦停止升慈寧宮寶座停止筵宴毋庸設立儀仗樂設而不作皇帝於養心殿行禮王公大臣二品以上各員在慈寧門外行禮三品以下各員在午門外行禮所有內廷宮眷及公主福晉命婦均著停止行禮皇帝停止升殿受賀其王公百官行禮之處均著照該部所議行○庚申先是朝鮮國領選使吏曹參議金允植投遞密書於李鴻章其書曰朝鮮國領選使吏曹參議金允植謹再拜上書於中堂爵前伏以小邦情形惟中堂燭照纖悉勝於小邦之自知前後代辦事宜提撕覺無所不用其極非智明仁深何以至此我寡君深感中堂之德欽誦靡已此次專差陪臣前赴天津恭聽指使允植辭朝時承

寡君面諭諄復鄭重使之代達景仰之忱且曰韓陳衷私無有所隱允植受命以來不敢違安夙夜趨程  
既到京城卽聞駐節保省逶迤前進敬致國書仰蒙中堂慰藉備至誨諭拳拳藹其如春頓忘羈旅之苦  
然初筵賜接展長在心敬勝於情辭不能達恐負寡君面命之意茲敢書陳所懷仰塵崇覽伏願垂察焉  
小邦山川險狹聞見局滯往在羅麗時疆場不靖頗尙武備自小邦開國以來境內又安民至老死不聞  
金鼓或數百年一見兵革而輒復忘廢現今武庫所存皆數百年前無用之器仗而國人猶恃而自壯曰  
何苦費財勞衆遠學新製夫器仗猶不欲學遑欲交達人乎往者法國陰遣教士煽布邪學其爲教大抵  
潰倫廢祭惟利是趨小邦立法嚴禁誅夷相續猶不滅忌國中士民莫不痛心疾首誓不與此夷共戴一  
天伊後西勢日旺氣運大變治兵護商勿洋天下察其意趣不專在行教一事設爲條約網羅四海入者  
相與出者孤立互相連合如七國之時此與往日局面又大不同矣夫有國有土者惟以保存宗社奠安  
生民爲務春秋二百四十年之間朝聘會盟殆無虛日不第諸夏衣裳之會卽蠻越鱗介之國玉帛相踵  
此豈不知禮義而然哉惟小邦則不然不問時勢可否惟以守經爲正禮斥和爲清議與其通洋而存不  
如絕洋而亡詎涉交際輒以邪學目之爲世所棄自丁卯以後日本投書求好朝議以爲近日日本變用  
洋制通倭卽通洋之漸卻而不受及乙亥秋日本兵船入江華衆論沸騰幾致生事我寡君靜鎮於上故



相臣樸珪壽調停於下復修繕好立約通商國受和平之福而論者猶至今咻咻上自朝廷摺紳下至巖穴草茅以及市井屠販之流所見皆同以爲不必交鄰恐納侮也不必講武恐滋事也閉境自守無如我何惟我寡君超然遠覽卓然不惑念孤弱之不可久支也知凡愚之難與慮始也又慮衆論之殆難力勝也撫循富容默運獨斷交鄰練兵等許多事務次第籌度將欲舉以措之昨年秋令中外廣薦人才量加收用今年春設統理衙門分治機務又令擢文武子弟年少者使習言語學兵技今又選徒遠赴學習製造我寡君之有猷有爲宵旰憂念欲保民社之苦心斷可知矣奈獨勞於上而無將順之人雖有一二臣同心無老成鎮物之望是以賸謀英賢託情遠交乙亥春相臣李裕元奏使入都得達姓名於堅轍之下中堂爲陳保邦固圉之道賜以手書李相歸獻寡君一見契悟傾慕不已自後連年書幣皆出寡君之意然李相亦不無贊襄之事漸見清議不與陰爲自貶之計露出中堂密函播人耳目私相譏侮傳及於日本往來之人今年有悖儒投進斥和之疏其中並論李相不當與中堂往復李相忿於自明頓改前見自附清議寡君赫然發怒即日竄逐於嶺南之巨濟府且念中堂爲我謀忠以德取怨并致日人之憾不勝慨惋分送朝士游歷於日本語及書函事必令到底發明無使貽累於中堂朝士之回果奏日人詳聞其事幾釋初憾寡君猶爲之憶憶不安臨朝展嘆今年八月又有逆臣安驥泳等聚不逞怨國之徒託言伐

倭實謀犯國事發制治渠魁雖已就戮餘黨迄未盡數以致領選之行派定已久而國內多故不能卽程遂致奄迫深冬者也伏念小邦處環海之中向孑然特立於萬國之外久爲衆手所指觀其成敗而北俄東日形勢相逼燕雀之處堂猶未足喻其急也從前每有緩急悉仰上國若今日之駭機一發水陸電迅四面受敵所謂雖鞭之長不及馬腹所以中堂屢示警告丁寧反覆使之先事周旋冀或舒東顧之憂者也雖然小邦積弱之餘急難自振縱云通商練兵非可時月見效爲今之道惟有擇邦善交講信修睦從以彌縫疏失以備陰雨庶幾爲目下之急務而泰西諸國中久聞美邦國富兵強心公性和國富則少貪兵強則可恃心公則處事平性和則執禮恭且聞近日頗聞華風購買書籍周孔之道未必無西被之理先通美國公平立約俾嗣後來款者一遵成式無害我自主之權此又急務之所當先者也凡此數計皆不出於中堂之成算辛勤靡迷若惘在己使小邦之人幸得一二開悟者實中堂之賜也雖然邦人之最愚者洋人也我寡君重遲民情未嘗顯言通洋若美船一朝來泊則美亦洋也國內橫議必將歸咎於寡君迎接之際事事掣礙反有起釁之慮觀於安駁冰之事可知矣欲倚中堂之重以鎮服羣情則中堂威著四裔誰不敬慕猶小邦愚俗不知畏懼觀於李相之事亦可知矣今此小邦聯美之計環瀛各國不應不心許而惟日俄及本國人所不欲樂聞者也日俄若知其機則必伎害沮撓事未可知國人若知其

機則必譁然蠢動功難順就此事宜速不宜遲宜密不宜疏事體重大彈壓國人之心宜名正言順以消狡鄰之謀惟有我 皇上明降詔旨先期曉諭於明年春責使之回踵遣派員協美議約則寡君得以憑仗 皇靈隨宜酌辦保合東洋永固藩屏其在此惟願中堂默運元機與神爲謀俾事成之後渾然無形跡之可尋如泰山喬嶽不見運動而功利及人使小邦愚民獲福而不自知豈非盛德之事乎嗣後凡干事務更煩指教國有終亦惟中堂之惠我寡君深有望焉至是李鴻章奏查光緒五年七月初四日奉 上諭總理各國事務衙門奏泰西各國欲與朝鮮通商著李鴻章查照丁日昌所陳各節作爲該督之意轉致朝鮮等因欽此當經 臣欽遵兩致朝鮮前任太師李裕元密勸其與泰西各國立約通商以牽制俄日各情並鈔函具奏在案本年正月二十五日總理衙門因屢接出使日本大臣何如璋函述朝鮮近日漸知變計商與美國立約請由中國代爲主持擬變通舊制嗣後遇有朝鮮關係洋務緊要之件由北洋大臣及出使日本大臣與該國通遞文函相機開導等因奏奉 旨依議欽此專函知照前來五月間適有美國水師總兵蕭孚爾來京面稱該總兵上年乘兵船赴朝鮮投遞國書欲與結約通好朝鮮堅拒不納今奉該國密諭求 臣爲之轉達並出示該外部原函 臣知朝鮮廷議尙未甚洽密屬蕭孚爾留京緩待機會六月間朝鮮委員副司直李應浚齎文來津 臣卽令津海關道鄭藻如繕具節略力勸朝鮮派

員赴津就便與美總兵蕭孚爾商議俟有頭緒再奏派大員同往面訂條約各等情交李應浚帶回已由  
鄭藻如於七月間在京密致總理衙門王大臣矣茲朝鮮國王派領選使金允植帶領學徒來直又別遣  
去冬使員卞元圭同赴保定謁見據稱李應浚帶到密函該國王深相契合奈國中論議不一甚難調停  
總求 大皇帝作主先期宣諭則諸般難梗之端自歸妥貼旋據金允植呈遞密書一件詳布原委並以  
聯美之計日俄及本國人所不樂聞擬請明降 詔旨於明春真使之回踵遣派員協美議約俾該國得  
以憑仗 皇靈隨宜酌辦等語情詞雖甚恭順究於事體非宜臣與筆談開誠曉譬以向來中國於外交  
各事必先由大臣等與各國商定然後請 旨遵行若事未辦而先奉 旨轉予外人以挾持之柄汝國  
王此論似未深知馭外情勢鄭藻如前議該國借學生赴津爲名派員協同前來與美總兵商辦尤無痕  
跡況昨接何如璋十月杪由日本函稱朝鮮近遣使臣趙秉鎬李祖淵赴日修改通商章程議立稅則日  
本不允業經辭歸欲於明年三四月奉使來津與美總兵蕭孚爾晤商如能與美國結一善約日本亦可  
仿照定議與臣所見相同幸蕭孚爾經臣留住或者其事易成該陪臣等聞知均尙領會謂此行不專在  
學造一事而承國王密諭深以此事爲重專望臣設法方便隨機指教卞元圭擬卽由津回國稟商該國  
王酌辦金允植亦赴津照料學徒靜候本國消息臣維朝鮮久隸外藩實爲東三省屏蔽與琉球孤懸海

外者形勢迥殊今日日本既使滅琉球法國又割據越南沿海六省中國已有鞭長莫及之勢我藩屬之最親切者莫如朝鮮日本務令通商復不允訂稅則抑勒把持計甚陰狡非先與美國訂一妥善之約則朝鮮勢難孤立各國要求終無已時東方安危大局所係中國即不必顯為主張而休戚相關亦不可不隨事維持多方調護保茲屬土即以固我藩籬除俟卞元圭回國後該國如何籌派明春臣到津後美總兵如何進止再行察辦具奏外所有朝鮮陪臣金允植密書謹照鈔恭呈 御覽並臣與相機開導各緣由理合繕摺由驛密陳 上諭朝鮮久隸藩屬自應隨時維持調護即以固我邊陲該國如與美國訂約則他國不至肆意要求於大局實有關係仍著李鴻章隨時相機開導妥為籌辦○奕訢等奏軍機處歷年所有漢字 諭旨寄信及議覆等項冊檔前於咸豐四年奏明每屆三年繕辦一次自光緒四年辦理以後本年復屆繕辦之期經臣等於二月內奏請繕錄並聲明將出力之供事隨案擬保奉 旨知道了欽此臣等遵即查照成例傳內閣中書十六員分冊繕寫並派軍機章京二員總司校勘計自光緒四年正月起至光緒六年十二月止共三十七冊又逐日登記號簿十二冊又剿捕檔三冊又洋務檔三冊又引見檔二冊並將積年舊檔一律補綴齊全查歷屆辦理清檔冊告竣均經奏蒙 賞給議敘在案此次繕寫三年檔案並將積年各舊檔督飭供事人等修補完善所有承辦各員及在館供事等可悉比較歷

屬告竣之例酌量 賞給議敘得 旨如所請行○祥亨等奏遵 旨保獎回勒泰軍營官弁並護解戰馬軍火各項出力人員得 旨該衙門議奏○癸亥 上諭 奏先嚴 壽皇殿行禮○諭御史劉治平奏順人昌平州現修邑志查明前賢事實開單請准入祀名官等祠各摺片著禮部議奏○甲子諭梅啟照奏請調員差委一摺浙江候補知縣將錫蕃著陳士杰飭令該員迅赴東河交梅啟照差遣委用○慶裕奏准刑部咨光緒七年七月二十日內閣奉 上諭御史胡降沅奏請將盜案仍照舊例分別首從辦理一摺著刑部議奏欽此查各省盜案向例由地方官詳由該管上司解省審勘由該督撫分別題奏將法所難宥及情有可原者於疏內聲明大學士會同三法司詳議各該督撫俟奉准部覆始行分別正法發遣乃車輿以來因剿辦土匪定有就地正法章程從此各省相沿即尋常盜案亦不待審轉覆核概行就地懲辦題奏之件十無一二同治八年原任御史袁方城奏請將盜案照舊核辦而原任大學士直隸總督曾國藩仍奏請照章就地正法並請令山東河南一體照辦十二年御史鄧慶麟請將盜賊土匪仍照舊例辦理等因奏奉 諭旨飭交部議請飭下各省體察地方情形妥議具奏嗣據各該省先後以游勇馬賊根株未盡具奏均未便一時即復舊制光緒五年十一月間復查各省拿獲土匪強劫盜犯有照例具題者有聲稱照章就地正法者並有尋常盜犯該州縣拿獲訊明後徑行處決隨後始行通詳上司

備錄供招送部者辦理紛紛未能一律奏請嗣後盜案各按距省遠近分別就地正法並解省審勘等因  
奏准通行在案在該督撫豈不知網開三面係屬好生盛德只以盜風既未全息卽辦理不妨從嚴今  
朝廷方開寬大之門而疆臣仍作極宜之計非特無此政體亦恐窒礙難行公同商議法貴去其太甚事  
必急所當先必欲復情有可原舊例莫若將就地正法章程先行停止應請 旨飭下各省督撫將軍都  
統府尹體察地方情形將夥眾持械強劫案件仍照成例解由該管上司覆勘分別題奏請 旨不得先  
行正法迅速妥議具奏統俟 臣部彙核辦理如各省盜風一律稍息正法可以暫遲則分別法無可貸情  
有可原之例亦可漸次舉行矣等因奉 旨依議欽此咨行到粵奴才當卽欽遵行司妥議詳辦茲據署  
臬司慶愛議詳查粵西自咸豐初年辦理軍務其時賊蹤遍地滿目荆榛計用兵幾二十年始得削平寇  
亂地方漸臻安定而伏莽尙待搜除夥眾劫掠所在皆有同治十三年奉准部咨御史鄧慶麟片奏軍務  
肅清省分拿獲盜匪請照舊例辦理當經前署司嚴樹森核議以粵西爲昔年肇亂之邦苗犵難處賊悍  
成風打劫殺人係其故智與他省情形迥不相同擬請嗣後拿獲情重土匪及夥眾持械強搶捕案件  
仍應從權辦理就地正法並由該州縣獲犯訊供後一面通報一面錄送該管府州就近親提覆訊核定  
罪名稟請批示再行正法倘供證未能確鑿案情尙有疑意卽不得概請就地懲辦致干查參以期無枉

無縱經升任撫臣劉長佑奏准通行在案數年以來各屬遇有拿獲劫情重盜犯俱係訊錄供詞稟候批飭解山該管府州覆訊取具切供據實通稟核其情節果係夥眾持械強行搶劫同惡相濟者方准就地懲辦倘有供招未確案情可疑即駁令再行研審實情分別辦理於嚴懲盜匪之中寓慎重人命之意雖非解省審勘必由該管上司細心覆鞠期於情罪允協未敢輕率從事現在各屬地方雖稍粗安而伏莽頻經搜捕總未能盡絕根株動輒聚黨成羣持械肆掠不但劫人財物抑且擄人婦女甚至焚燒房屋拒斃人命習以為常兇悍之風仍未稍息左江之南太泗鎮等府距省窵遠或與越南接壤或與雲南廣東毗連籌辦邊防時關緊要兼之昔年土田州構亂漏網之巨寇劉興佳與土匪趙蘇奇勾結復在向武果化土州一帶糾黨欲圖起事雖經官軍擊散並將趙蘇奇拿獲而劉興佳蹤跡詭秘餘黨亦未盡淨各州縣緝捕正當喫緊此外右江之柳慶恩等各屬辦理善後清除伏莽亦未可稍懈卽桂平梧鬱諸郡山徑叢雜水陸分歧匪類時虞出沒均應隨時認真訪緝以靖閭閻若令各州縣將一切盜案悉行押解赴省長途跋涉動逾一二千里既恐有意外之虞且一經照例押解聽候部覆耽延數月雖同一正法不能如卽時就地懲辦足使凶頑觸目驚心再四籌維似難遽復舊制等情具詳前來奴才覆加體察所擬皆係實在情形伏思拿獲盜匪就地正法本係軍興時權宜之舉若地方漸就安謐自應規復舊制以昭嚴



大之仁誠如部議網開三面係屬好生盛德奴才又何忍務從嚴峻致傷天地之和但就粵西現在情形而論豈不得謂之已安已治辟以止辟尙宜用猛倘稍事寬假則玩法者愈衆罹法者更多強梁有僥倖之心良懦遭蹂躪之害轉失 朝廷除暴安良之意揆時度勢所有盜匪就地正法章程一時尙難停止擬請嗣後各州縣拿獲土匪及夥眾持械搶劫案件仍照舊章程解由該管府州訊取切供妥爲議擬候核明批飭就地正法俾兇暴不致久稽顯戮地方官亦不得專擅殺之極期無枉縱而昭炯戒仍俟盜風漸息地方綏安隨時察看情形請復舊例下刑部知之○乙丑予雲南督甯州員女張楊氏旌表○內寅命麟書辭允升往江蘇查辦事件○命出使英法德俄各國大臣曾紀澤留任三年○命直隸津海關道鄧漢如開缺以四品京堂候補○總理各國事務衙門奏光緒七年六月初五日吏部奏定出使隨員保獎章程內開凡出使外洋隨帶各員請獎仍照異常勞績辦理如有保請京堂及京職無論題選咨留班次均一律議駁等因是原定章程特不准保舉京職之無論題選咨留班次並非不准保舉京職也嗣准吏部咨稱光緒七年六月初五日具奏出洋隨帶人員如有本係京官保舉無論題選咨留暨各項班次並京職升階均一律議駁等因一摺奉 旨依議欽此欽遵鈔錄原奏知照前來查原奏內稱定章各衙門漢司員如在外省出力保奏無論何項勞績不准保舉留補京職若出使人員准保京職與章程兩歧等

語自係爲慎重保案起見第念該員等遠涉重洋備嘗艱險較之在外省出力者情形本屬不同舊章不准保舉無論題選咨留而猶准保以應升之階及別項班次辦理最爲允當若凡京職人員一經出使便非改就外官不可勢必至視出使爲長途遴選人才更爲不易且軍衙門同文館學生多係京職其於外國語言文字非習練精通不足以應隨帶出洋之選倘差滿回華盡改外任是學業有成者概令舍而之他既非儲才待用之意並恐後起之人不足以繼之於使事尤多窒礙臣等公同商酌擬請就吏部此次章程量爲變通嗣後凡出使各國保舉人數每三員准其酌保京職一員以次遞推任缺無濫仍照原定章程不准保舉無論題選咨留班次別項勞績均不得援以爲例庶於鼓勵之中仍寓限制之意得旨如所請行○岑毓英奏臺灣地方水土惡劣既隔重洋復有烟瘴內地人員多視爲畏途故歷任撫臣渡臺皆以投効員紳間雜差使蓋取其不避艱辛又能耐烟瘴也今臣奉命整頓臺防如修城濬河並招撫生番等事在在需人擬仿照前撫臣等於本地紳士及投効人員中擇其熟悉情形勤謹耐勞者酌量差遣以資臂助報聞○裕祿奏准刑部咨議覆御史胡隆洵奏請將盜案仍照舊例分別首從辦理一摺臣部議將就地正法章程先行停止請旨飭下各省督撫將軍體察地方情形將夥衆持械強劫案件仍照例解由該管上司覆勘分別題奏請旨等因奉旨依議欽此行令迅速妥議具奏到院仰見

聖主欽恤庶獄明慎用刑在各省疆臣仰體 皇仁但有可以推廣盡善之處敢不力求漸復舊制惟查

皖省界居江鄂豫四達之衝民風著名强悍劫盜之案本倍於他省是以穎鳳二府暨廬屬之合肥縣兇徒結夥持械之案皆有例設從重專條追軍興以來皖北各處半爲捻逆藪巢皖南尤爲客民麇集奸黠之徒弱肉強食結衆玩法習爲故常歷經奏明留設防軍以資彈壓又奏定就地懲辦章程以禁奸暴近年始得少安久邀 聖明洞鑒現自肅清後雖著名漏網匪首續陸續捕除而降衆散勇之散處者不一而足加以近年各處裁撤勇丁紛至沓來此等游手之徒勢不能悉安耕鑿且沿江沿淮等處之哥老會安清道友以及齋匪等項名目靡地蔑有根株總難淨盡不法之徒動思乘隙勾結如本年豫省新蔡恩縣滋事之案可爲明鑒若不有犯立懲不足以儆兇頑查歷年以來於地方糾衆持械強劫各案實係離省爲遠者隨時照章札委該管道府暨特委明幹大員前往督審確實錄供批飭就地嚴懲實冀辟以止辟用期綏靖地方其有情節稍輕距省較近者仍係照例解省勘審未敢草率從事現經部議奏奉 諭旨飭令體察具奏詎就現在地方情形督同司道等詳加察看安省審辦盜案就地正法章程一時實難遽復舊制合無仰懇 天恩仍准照章辦理俾匪徒知所儆畏地方得就久安俟數年後盜風漸息卽當隨時察酌情形奏請改復舊制下刑部知之○丁卯 上詣 大高殿祈雪○准定安開缺回旗調理以文

網署黑龍江將軍○諭御史清漪奏庫差年滿不行呈報請旨飭查一摺據稱內務府廣儲司銀庫員外郎曾潤文需到任已逾三年並不照例呈報每遇各處領款扣成押勒等語著總管內務府大臣確切查明據實具奏○已已雪○諭裕祿奏請調員差委等語補用道前任安徽甯國府知府高崇基著直隸總督飭令該員俟服闋後前赴安徽交裕祿差遣委用○諭步軍統領衙門奏拿獲賊犯請交部審辦一摺所有拿獲逆竊 惡黨等處銅練各物之賊犯袁大馬卽袁得山袁立兒卽袁順兒王五卽王五立兒連毛兒張大卽張曼兒大胡卽胡九王羣兒徐志祥侯善祥卽侯善子侯三卽侯善田侯復山張大海李朋均著交刑部嚴行審訊其未獲之王大順兒等著步軍統領衙門順天府五城按名嚴拿務獲歸案至查拿此案各犯出力員弁著刑部於定案時聲明請旨○庚午諭軍機大臣等錫綸奏請飭撥防軍應需鉛藥礮位一摺塔城防軍需用利器目前天津機器局礮彈等物能否勻撥若干每年約可撥濟鉛藥等項若干著李鴻章酌量撥給所請派人教演之處並著據派前往知照錫綸查照辦理其製造經費及運解川資准由該督核實報銷○諭刑部奏各省軍流徒人犯請仍復年終彙報舊例一摺各省軍流徒人犯向係年終彙報經停止現在查辦減等散漫無稽各省未經造報者甚多殊屬遲延且恐有遺漏情事非所以溥仁施而昭周密其有因案牽涉之犯亦以轉輾行查辦理需時嗣後著各省督撫將軍都統



府尹等仍照例將遺軍流犯定地發配及到配安置除專咨報部外均於年終逐案摘敘事由並聲明何司案呈造冊稟報徒罪人犯一體辦理該部即纂入例冊遵行並著各該省查照本年六月部定章程迅即備錄各犯案由分別官常犯准減不准減遺冊聲敘名口總數趕緊題咨報部其已報各省有應行補報之犯亦著一體迅速造報毋再稽延○諭前因御史清漪奏內務府廣儲司銀庫員外郎曾潤文需差滿不報勒扣放欸等情當諭令總管內務府大臣確查具奏茲據廣詩等奏稱曾潤文需等均係二年期滿惟現屆清辦六科之年援案暫留該員等稽核欸項一俟清查後即行揀選更換至銀庫放欸均經該大臣等分別核減成數斟酌放給該員等無從舞弊等語曾潤等被參各欸既經查明並無其事即著毋庸置議惟庫欸關係至重仍恐日久弊生該大臣等務當隨時認真稽查如有司員等朦混舞弊情事即行從嚴參辦毋稍徇隱○癸酉馮舉驤奏准刑部咨光緒七年七月二十日內閣奉 上諭御史胡隆洵奏請將盜案仍照舊例分別首從辦理一摺著刑部議奏欽此遵查軍興以來剿辦土匪定有就地正法從此相沿即尋常盜案亦不待審轉覆核概行就地懲辦各省既不按例題奏供招又或並不咨送是否難有抑或司原部臣無從得知又復從何核辦公同商議法貴去其太甚事必急所當先必欲復情有可原舊例莫若將就地正法章程先行停止請 飭下各省督撫將軍都統府尹體察地方情形將夥眾

持械強劫案件仍照成例解由該管上司覆勘分別題奏請 旨不得先行正法迅速妥議具奏統俟刑部議核辦理如各省盜風一律稍息正法可以暫遲則分別法無可宥情有可原之例亦可漸次舉行等因其奏光緒七年閏七月二十五日奉 旨依議欽此咨行到臣遵卽行司通飭各屬將尋常夥眾持械搶劫案件仍照成例解勘不得先請正法並飭該司體察時事該地方情形統籌妥議以憑核辦去後茲據升任臬司沈應奎詳稱強盜搶劫等案向俱遵例分別擬罪解勘專案題奏聽候部覆始行正法自咸豐九年因陝省賊氛未靖奸匪每乘機竊發經前撫臣曾望顏奏准部議嗣後陝省遇有行劫搜賊聚眾持械搶掠得財兇暴眾著者訊明法所難宥無論首從均於解省審實後恭請 王命先行正法傳首犯事地方懸竿示眾以昭炯戒等因歷經遵照辦理嗣於同治十三年及光緒二年屢奉刑部咨飭陝省辦理土匪並夥眾持械強搶案件應否規復舊制卽就地方情形妥議等因復經前撫臣譚鍾麟以體察地方情形目前游勇充斥仍難改歸舊制具奏在案是強盜搶劫之案擬請就地正法原因賊氛未靖匪徒充斥立法以示懲創本係權宜之計現在軍務肅清固應改歸舊制惟西陲雖經戡定仍待撫綏關外防營尙多勇丁之裁汰告假回籍者及招募補額與投効赴營者由陝往來如緝若輩本非安分之徒加以游勇勾結爲奸不免肆行搶劫且南北二山幅輿遼闊深林窮谷匪徒出沒無常搜搶結盟比比而有此

等游勇土匪情無可原不比尋常案件若照例解審分別題奏不特長途轉解疏脫堪虞更恐奪犯拒捕  
枝節橫生抑且兇暴之徒久稽顯戮殊不足以示懲創而儆效尤悉心酌議擬請將尋常強盜案件遵照  
定例審擬解勘其游勇土匪聚眾搶劫兇暴眾著者仍遵前奉部議訊明法所難宥各犯無論首從解省  
審實後恭請 王命卽行正法傳首犯事地方懸竿示眾等因具詳前來臣查該司所議俱係實在情形  
自應准如所議分別辦理覆查光緒六年三月接准部咨議奏各省拿獲土匪並夥眾持械強劫案件實  
係距省黨遠解犯中途堪虞就近解交該管道府覆審明確免其解省由該管道府核明情罪稟經督撫  
批飭就地正法按季彙案具奏等因光緒五年十一月十七日奏本日奉 旨依議欽此欽遵在案臣查  
常刑原以誅莠民重典特以治奸宄相輔並行不宜偏廢陝省西接甘肅化平等處撫回其初俱係叛民  
罔知法紀往往三五成羣各持刀械潛入陝邊滋事漢南各屬界連川楚舉步皆山江湖等會紅簽黑簽  
亦俱鄰省亡命潛句土匪結會拜盟黨與動至百數十人之眾搶劫姦拐甚至殘殺善民此等亂民非重  
典無以明示懲創臣於州縣具報前項重案俱遵光緒五年奏定章程飭解該管道府親提覆審明確議  
擬稟復臣與陝甘督臣核明情罪批令就地正法按季彙奏亦在案統核地方情形參觀解陝省盜風  
尙未稍息正法未可稍遲應請仍照就地章程辦理容俟隨時察看游勇漸少土匪漸清再行奏請規復

制下刑部知之○衛榮光奏臣承准軍機大臣字寄光緒七年九月初五日奉 上諭給事中張觀準奏山西州縣遇有差使過境苛派民間夫馬等因欽此當經恭錄行知督後局司道欽遵查辦去後茲據詳稱查山西省南有驛州縣西來者以永濟縣爲入境首站東來者以平定州爲入境首站歷太汾平蒲四府絳解靈三州所屬地方係陝甘川滇暨新疆各城往來要道輪蹄絡繹惟恃額設夫馬不敷供給不得已借資民力情形早年均經奏明有案惟因支弊生遇有差使過境丁胥人等往往浮開捏報勾串分肥加以差差人員用一索十再行折價民力不支至有日久折價賣車馬而回者地方官又以車馬取之於民不其愛惜於是官之親友丁胥之親友往來車馬無在而不令民支應以至力役之徵倍於正賦實差蠲予之慘誠如該給事中所云者並有該給事中言之不盡者痛心疾首竊爲晉民苦累大端前任撫臣曾國荃暨稽查山西賑務工部右侍郎臣閻敬銘深悉此弊曾將均減差徭一節彙案會奏隨即派員分赴各府州地方澈底清查凡一應條款皆閻敬銘親手裁定大約民間設局自行支差者在事紳董令地方會同舉充不准攤用地將局費悉有定數不准絲毫多支仍逐日將支差各名目車馬用數登記印簿官紳循環考察每月榜示一次倘有應支差使逾越限制及本非差使濫行支應者准赴上司衙門控訴便爲究辦若無局處所即計通年所費折錢交官自辦概免稟傳所有此項用費統按地糧攤派較之



改章以前每歲差攤十已減去六七卽如永濟向來差攤三萬串者今只一萬三千餘串夏縣向來差攤一萬三四千串者今只五千餘串霍州介休平遙向來差攤一萬數千串至二萬串者今只八千餘串及八千串其餘大率視此此皆省南路州縣現辦差徭之實在情形也至省城迤北由忻代大同朔州朔平赴歸化者爲正北驛站近年差徭減少其中有民間設局供支之處有由行戶抽用辦理之處查無前項流弊現尙照舊辦理惟靈石平定等州縣民間向不供應差徭以故設有驛轎支應年來差使拉僱車馬之害商旅胥受其困該給事中所謂扣留賣放者殆卽指此然相沿日久將改歸於民間驟添巨累斷非衆情所願改歸於官則有限廉俸夫豈獨力能支而且地處深山車馬短絀卽僱價給值亦苦無可僱覓卽與該局司道早經商議變通經久之計一俟籌定辦法自應從嚴禁革用蘇積因此外州縣卽於到任後周諮博訪委督確守闕敝鉅所定條規認真辦理尙不至有苛派擾累情事茲復欽承 聖諭卽惟有督飭司道隨時糾察如有短缺驛馬及濫應諸弊卽行據實參辦仰副 皇上重惜民力之至意報聞○甲戌恩承丁憂解任以文煜署正紅旗漢軍都統崇禮署步軍統領廣壽兼署禮部尙書○子穆騰阿病假一月以奕劻署鑲黃旗蒙古都統○諭翰林院侍講學士尙賢奏奉天教職選缺請飭妥議章程等語著吏部議奏○諭翰林院侍講學士尙賢奏敬陳鄉會試事宜酌擬四條一摺著該部議奏○乙亥

欽奉 慈禧端佑康頤昭豫莊誠皇太后懿旨恭親王奕訢之子載漪著加恩賞給不入八分輔國公醇親王奕譞之子載洸著加恩賞給奉恩輔國公○大學士寶鋆因病請開軍機大臣翰林院掌院學士差使不允○諭據御史陳啟泰奏吏部於查核兵部擬補郎中一缺前後兩歧尙書萬青藜執法徇私等情當諭令都察院堂官查奏茲據章華等覆奏摺內於原參萬青藜授意司員各堂官爭之不得及萬青藜袖出一稿各節並未逐款查明聲敘殊屬含混著章華等再行確切詳查據實具奏○丁丑以臚書薛允升出差命瑞聯兼署理藩院尙書本格署鑲白旗漢軍都統補世長兼署刑部左侍郎○命志文英華嵩林榮桂專司稽察一年旗務○欽奉 慈禧端佑康頤昭豫莊誠皇太后懿旨前據內閣侍讀學士文碩奏門禁宜嚴並變通大臣進班章程各摺片著醇親王奕譞會同御前大臣等妥議具奏○總理各國事務衙門奏出使英法兩國大臣一等毅勇侯都察院左副都御史曾紀澤於光緒七年十一月初八日奉旨著再留三年欽此欽遵行知在案查 臣衙門奏定章程一二品充頭等出使大臣給俸薪銀一千四百兩二三品充二等者一千二百兩三品充三等者一千兩四品充三等者八百兩光緒四年曾紀澤由四五品候補京堂 派充出使英法兩國大臣當經 臣等以曾紀澤承襲侯爵所有俸薪請照二三品充二等者辦理奉 旨依議欽此今曾紀澤以都察院左副都御史留使英法兩國本係三品充二等之員月給

俸薪照章應給銀一千二百兩等公同商酌會紀澤前以候補四五品京堂出使英法兩國其俸薪既照二三品充二等者支領現在升任三品且兼充出使俄國大臣其俸薪擬請按照頭等辦理以示優異從之○總理各國事務衙門奏臣等於本年八月二十四日奏請 賞給英國使臣威妥瑪等寶星摺內聲明再由臣等釐定等第酌擬章程奏明奉 旨後製造頒給等因奉 旨依議欽此欽遵在案查泰西各國行用寶星大抵視品級之崇卑定禮文之隆殺約言其制則有四端一曰名目各國張掛旗幟制度各有不同中國之旗幟向例以繪畫龍文爲識現擬仿照此例於寶星之上鑿以雙龍卽名曰雙龍寶星自頭等第三以下皆於上面鑿 大清御賜四字其頭等第一第二係表優異之典不得率行濫請一曰等第各國之寶星有國君自行佩帶因贈予與國之君者有頒賜臣下而推及與國之臣下者分際迥殊等威不一現擬將寶星分列五等並於頭二三等中每等再分三級計次序之數共十有一卽於寶星上鑿刻清文註明等第字樣自國君以至工商人等各如其分以相酬庶名器不至濫邀而更免畸重畸輕之弊一曰藻飾我 朝之有品級考例意甚嚴故上自王公下及生監向以頂戴別尊卑現擬參用此意於寶星之上鑿嵌珠寶一顆分其顏色以示區別一曰執照各國每遇發給寶星之時除應行之文書外另備執照一紙給本人收執以爲憑現擬於寶星執照內前半恭錄 允准釐定寶星之 諭旨後半填寫

承領執照之人姓名籍貫敘明因何給予之故暨給予之年月日其頭等第一第二未便加用執照應由臣衙門知照各國外部大臣分別轉贈移送其頭等第三以下應用執照則蓋用臣衙門關防此後本人若有劣跡經本國斥退者仍將寶星執照一律追繳其餘尺寸之大小纒帶之短長亦各隨等第以判低昂以上所擬各條考之各國崇尚寶星之例立法雖異立意則同要皆因時制宜以期折衷至當謹將開列清單酌擬執照格式暨寶星式樣繪圖恭呈 御覽嗣後凡遇 頒賞頭二等寶星奉 旨後均由臣衙門製造頒給其三等以下寶星何處奏請 頒賞即由何處照式製造頒給仍知照臣衙門蓋用關防發給執照以備稽核得 旨允行○諭刑部奏審明迭竊宮殿銅練寶匣等物賊犯按律從重定擬一摺此案袁大馬袁立兒王五膽敢糾夥迭竊宮殿銅練寶匣等物皆不畏法至於此極徐志祥身充太監輒敢吸食鴉片復招引竊賊肆竊宮禁實屬罪不容誅連毛兒大胡於禁城重地肆行出入偷竊侯善祥知情銷贓亦屬異常藐法亟應從嚴懲辦袁大馬即袁得山袁立兒即袁順兒王五即王五立兒均著處斬徐志祥依擬應斬著即行正法連毛兒大胡即胡大侯善祥即善子侯均著依擬斬監候以肅法紀其在逃之韓老西李三狗狄合兒劉四定福傅九等仍著步軍統領衙門順天府五城御史一體嚴拿務獲究辦所有拿獲此案各員并著該衙門查明奏請從優獎勵其在內值班之前鋒統領護軍統領總管內務

府大臣平日漫無稽察所司何事著各該衙門查取職名照例議處值班官兵著按照各該犯供出月日一併查明分別懲處○戊寅舉行三壇祈雪祀典 上親詣 大高殿行禮○以黃體芳爲內閣學士○諭上月三十日夜 慈寧宮前殿及大佛堂瓦上失去銅練八掛並有遺棄木桿在地及揭去瓦片情形宮禁森嚴竟有竊賊混入該官兵等所司何事迭經降旨嚴申門禁竟敢視爲具文怠玩至於此極實堪痛恨著前鋒統領護軍統領總管內務府大臣查明值班官兵丁履行參辦該處總管首領太監交總管內務府大臣嚴飭並著步軍統領衙門順天府五城一體嚴緝賊犯務獲究辦○諭前據御史鄒純嘏奏參河南候補道蔣珣等各款當諭令梅啟照查明具奏茲據奏稱查明道員蔣珣前在署臬司任內並未需索節壽陋規惟值伊母生日僚屬間有饋遺略爲收受禹州創辦藥材釐捐奏明設局並無受賄消弭控案情事其在省城置買市房雖係藉作公所究屬不知避嫌候補知府歐陽霖前在河內縣任內裁去里總改立急公社名日後因有弊事遂經廢去固有長種加漕受賄枉法及乾沒疏河款項等事惟在省城置買住宅亦屬不知避嫌等語蔣珣歐陽霖均著交部照例議處至知縣趙集成前在安陽縣任內有需索鹽店陋規情事業經病故著免其置議尉氏縣知縣李芳雲徵收商城縣任內稅契銀兩查已如數找解與李鶴年並非至戚亦無門丁等招搖撞騙情事實據該員稟經調省其有無嗜好著李鶴年隨時

查看至禹州添設釐局能否裁撤並著該撫酌度情形奏明辦理○庚辰予故吏部右侍郎錢寶廉祭葬  
○辛巳調邢世長爲吏部右侍郎兼署刑部左侍郎以許庚身爲禮部右侍郎周家樹著左副都御史○  
諭御史李郁華奏各省釐金分卡請飭毋庸輕議裁併一摺抽釐濟餉原屬權宜之計著設卡過多必致  
貽累閭閻是以迭經降旨令將分卡酌量裁併誠以裁減一分卽寬一分民力於籌餉之中仍寓恤民之  
意乃該御史竟請毋庸裁併至謂貨物因釐增價商本無貲并貧民所用鹽布無多以爲無累於民殊屬  
不諳政體所奏著毋庸議至各省釐卡委員如有侵漁中飽及縱令丁役需索留難等弊該督撫當隨時  
據實參辦不得稍有徇縱○壬午順天府尹游百川疏進故戶部主事郝懿行著春秋比事屬辭記春  
秋說略爾雅義疏山海經等疏四種 上嘉納之○諭軍機大臣等有人奏淮軍統將周盛傳周盛波帶  
所部械字營剋扣乾沒米鹽等物悉由該統領轉販分派各營領受勇丁含怒蓄怨羣思得而甘心又吳  
長慶唐定奎等軍刻待勇丁分駐江南一帶鼓噪時聞上年吳長慶所部調駐山東行至清江一閱而散  
等語究竟有無其事著李鴻章按照所參各節確切查明據實具奏不准迴護掩飾原片著鈔給閱看○  
癸未殷兆鏞以病免調張蔭卿爲禮部左侍郎以孫毓汶爲工部右侍郎張家驥著左副都御史○諭左  
宗棠奏遵旨查辦事件先行覆陳大概情形一摺湖北候補道楊宗濂著先行革職聽候查辦湖北漢黃

德道何維鍵著卽開缺送部引見湖北候補知府李謙著彭祖賢查看甄別其餘應查事件仍著左宗棠  
詳細查明據實具奏○諭衛榮光奏特參虧短交代各員及故員家屬潛回旗籍請旨革職查抄勒追一  
摺山西前任寧遠通判佛爾根額等虧短交代銀兩爲數甚鉅迭經嚴催未據完解輒敢潛回旗籍延不  
赴省清結實屬玩泄已極前任寧遠通判佛爾根額富明均著卽行革職已故豐鎮理事同知玉麟已革  
大同縣知縣啟瑞及已故朔平府理事同知降秀已故署豐鎮理事同知薩麟已故應州知州李慶松已  
故署應州知州強兆芸已故石樓縣知縣張德立等家屬山衛榮光移咨各該旗籍都統督撫先將各員  
家產嚴密查抄備抵一面將各該革員及故員家屬提解赴省勒限嚴追以重帑項○甲申諭李鶴年奏  
現審犯案大概情形請派員覆訊一摺所有斬犯胡體浚臨刑呼冤一案著派梅啟照會同李鶴年訊明  
具奏○諭章華等奏遵旨再行確查據實覆奏一摺據樞吏部於鄧天符擬補郎中一案經承辦司員回  
明各堂公同照章議駁旋因兵部援案咨查復經查出已故戶部郎中汪朝棠准補之案與鄧天符請補  
題缺事同一律回堂援案照准萬青葵實無授意司員各堂官爭之不得及袖出一稿之事等語此案既  
據逐款查明卽著毋庸置議承辦司員於初次議駁之時未能查出成案率行定稿實屬疎漏著查取職  
名照例議處並著吏部將各項補缺章程詳加釐定務歸劃一毋得辦理兩歧○加賞資善堂煖燠粟米

三百石○乙酉 上詣 太廟行禮○丙戌哈祭 太廟遣奕綜恭代行禮○劉長佑奏臣等於光緒七年十一月初五日承准軍機大臣密寄十月十五日奉 上諭總理各國事務衙門奏法人謀佔越南北境並欲通商雲南擬籌辦法各摺片覽奏均悉越南向隸藩服爲滇粵兩省屏蔽法人據其西貢一帶現復以東京捕盜爲名添置兵船並欲由紅江通商雲南計殊巨測該國積弱已久若任其侵削則滇粵藩籬盡爲他族逼處後患不可勝言務當詳加揆度合力圖維庶可弭釁端而安邊境並將如何辦理情形隨時詳悉密陳欽此欽奉之下莫名敬悚仰見 皇上軫恤藩服慎固封圻之至意臣等承乏邊方敢不勉竭駑鈍思所以弭釁安邊上紓 宵旰竊意防禦之道以慎密爲先控制之方以利便爲要法人居中爲變尙在未動若合水陸內外並防則防禦之中有控制之勢越南水路距澳門五十餘更惟廉州協營汛地與之連界海面尚無師船往來近年招商輪船運米越南則往來甚熟李鴻章請於商船往越之際添設兵輪同往游弋與會紀澤請撥師船數艘移近南服所見相同要須假市繹之便以漸移入東京借護商之名分泊順化等處既可以遠壯聲威使彼有所嚴憚更可以近探動靜在我得爲豫防再派得力大員隨機密諭越王並令勸慰相聞則越南君臣縱不能奮發自強亦不忍輕背 大德至陸路則廣西現有防軍駐紮越南邊境助之緝捕若於現有之營添調勁卒於毗連之地潛設要防是備禦在無形之



中與兵輪有相應之勢不至敢法夷之疑議即可爲越國之聲援昨接慶裕來函現已議增防軍與臣等所籌正合若雲南僻在西南於越南交界地方從未設有防軍倘連匪竊列戍轉孤越人之勢卽如丁日昌所云添設關卡堵塞竅徑亦恐外人得以藉口尤虞內匪乘而生心第事變無常未可逆料若竟不爲戒備一旦變起倉猝始謀調兵遠赴則無以爲綏藩之計更無以爲固圉之方臣等至愚亦惟有藉辦土匪爲名於臨安開化廣南各郡增募練軍遴員統帶無事則勤加訓練以資巡防有事則相機應援以便調遣以現在情形而論但能如此設防惟念法夷自據嘉定六省以來越南四境皆有商埠教堂恣其橫行無所阻礙所顧忌者惟該國羣盜久據要津今羣盜勢亦稍衰故欲捫然除之以并其國自非中國提招越王必無以圖存然法夷徇其君臣漁其財利已非一日取越與否非有甚異其所以處心積慮者乃在通商雲南先以圖越爲嘗試中國庇之則求開市雲南寢取越之說中國置之則且全取越境爲漸進之謀此時稍失權衡卽貽後日無窮之患臣等再四審度以爲待其既吞越境爲守邊之計不如乘其始動爲弭釁之謀滇粵三省與越壤東西首尾山洞相連幾二千里叩關造釁莫可端倪要害與共勞費滋甚分之則患勢弱合之又恐防疏若及此時弭釁於外則自三江口以至海陽一帶東西僅數百里其西北省之宣光興化兩省現有該國副提督劉永福駐守以中國兵力爲之禦敵東京兵衆而力省以視防

守滇粵之邊勢逸懸殊利害相遠然遽以兵屯禦河內則有敢釁自我之慮待其已變而始出境相援則有鞭長莫及之憂伏念越南爲我藩臣及同治以來粵省屢次遵奉 諭旨爲之出兵助剿四夷所共知聞荷明示以綏藩之意則可直用其禦敵之謀願 皇上令總理各國事務衙門召集各國駐京公使並令南北洋大臣召集諸國領事秉公會議開示信義宣 列聖之寬大以動其心舉衆國之公法以破其計各國公使及領事豈無一二守正之人辨其曲直卽法人之狙猾亦豈願以失利棄好捐津滄各口之利源幸而從之則戢兵不用之術也苟其不從則法國敢釁之罪也曲在法國釁在法國則可以宣示其用兵之意而彼不得以爲藉口之端用防邊之力於關外而我不受其害移防邊之師於江邊而彼不得議其爭一朝有弊朝發夕至然後可以救護其東京而無失援之慮也顧廣東自廉州而西白龍尼玉山門諸處海岸迂險非十日不能抵海陽又四五日始能至東京惟水師則自廉州冠山前發順風二三日卽可抵其海東府雲南之廣南開化雖與連境要皆其西北湯關山谷險峻軍行難速若取道臨安府之蒙自由蓮花灘而南旬日始達其水尾等處又須八九日始至其東京惟自廣西入境皆可七八日達河內請以廣西兵二萬爲中路之師而廣東雲南各以萬人爲犄角若以廣東水陸之師自廉州而入雲南之兵出洮江而東而別以輪船守廣南順化港口斷其首尾法人必無自全之理至劉永福籍本越西爲

賊首吳亞終之黨後與黃崇英攜隙臣在廣西巡撫任內曾於越使回國時言其可用以辦賊後果就擒  
爲該國副提督曾以兵力拒戰東京今駐兵保勝州與滇邊河口相接應請 皇上密諭越王信用其人  
給其兵食並由臣等潛爲聯絡喻以忠義亦可以効指臂而助聲威第滇粵三路之師相去千里行有遲  
速勢難尅期並進轉致疏虞非一事權不能用命擬請 皇上於南北洋大臣內 特簡一員駐廣西  
爲之督辦廣東雲南之軍並歸節制庶幾事權歸一聲息相通東西並進乘勢赴機可無違律失機之慮  
如南北洋大臣一時未便移動或卽 命兩廣督臣爲總統大臣其形勢較爲利便於調度更易靈通是  
否有當均候 聖裁自諸夷通商以來江海衝要皆爲所伺其未開市者僅西南一隅若其遂振越南進  
規滇粵則楚蜀之藩籬盡撤卽英俄之外患益深事關天下大計臣等愚昧亦不敢不盡其懷懷之誠惟  
雲南自平定叛回以來土曠民窮財力殫絀臨安開化邊境其未經剿撫之黨往往逃出西貢趨附法夷  
越患緝姦在在皆宜防微釀制額兵僅復五成外惟練軍五千以之分布邊鎮尙形不足此次籌援出境  
務必增兵十數營方敷調遣其兵餉所出爲數較多相需尤迫應請 旨飭下現協滇餉各省源源撥解  
以資接濟勿復仍前延緩並著四川督臣於現協各款外另行增撥若干按月籌解來滇庶可以充軍實  
而備緩急下該衙門知之○丁亥諭烏拉喜崇阿奏謝入座次序恩一摺本年侍衛處奏請定朝班坐次

並無烏拉嘉崇阿銜名該左都御史具摺謝恩實屬錯謬著交部議處○是年羅馬尼亞國王沙勒爾第一以晉號君主乞駐使臣代遞國書命總理各國事務衙門王大臣等傳旨致賀○統計出口貨值銀七千一百四十五萬二千九百七十四兩進口貨值銀九千一百九十一萬八百七十七兩相抵虧二千四十五萬七千九百三兩凡徵貨稅銀一千四百六十八萬五千一百六十二兩